

ASO LUA, 6 AUKUSO 2013

Na tauaofia le Fono Aoaofaitulafono i le itula e 9:00 i le taeao e tusa ai ma le Polokalame o Fonotaga a le Palemene 2013.

Na nofoia le Nofoa e le Fofoga Fetalai i le itula e 9:00 i le taeao.

Tatalo.

MALELEGA MAI LE AO O LE MALO

Na fofogaina e le Fofoga Fetalai Malelega mai Lana Afioga Mamalu, O Le Ao o le Malo.

1. “TUSI mo:

Le Fofoga Fetalai:

E tusa ai ma le Mataupu 59 o le Faavae o le Malo Tutoatasi o Samoa faapea Tulafono Tumau 95 a le Palemene ua tuuina atu nei le maliega i le Fono Aoaofaitulafono e iloiloina ai Tulafono Tau Faaofi ua faaalua iinei:

1. Tulafono Tau Faaofi o Faiga Aloaia e Totogi ai Tupe a le Atunuu 2013.
2. Tulafono Tau Faaofi o Aperenitisi 2013.
3. Tulafono Tau Faaofi o Teuteuga o le Tulafono o isi Iuga a le Faamasinoga e Foia ai ni Feeseeseaiga 2013.
4. Tulafono Tau Faaofi o Teuteuga o le Tulafono o Pule o Vaega Fanua 2013.
5. Tulafono Tau Faaofi o Teuteuga o le Tulafono o Lafoga o Tupe Maua 2013.
6. Tulafono Tau Faaofi o Taumafa 2013.

TUUIINA ATU i lou nei Lima i lenei aso Gafua 5 o Aukuso i le tausaga 2013.

(Sainia): Tui Atua Tupua Tamasese Efi
O LE AO O LE MALO.

6 AUKUSO 2013

Malelega mai le Ao O Le Malo

2. TUSI FAAMAONIA O LE TULAGA FAANATINATI.

E tusa ai ma aiaiga o le Tulafono Tumau 99(2) O AU, TUI ATUA TUPUA TAMASESE EFI, O LE AO O LE MALO, ua ou tuuina atu nei le Tusi Faamaonia o le Tulaga Faanatinati o Tulafono Tau Faaofi ua faaali atu iinei mo le tagofia e le Fono Aoaofaitulafono i lana Fonotaga o le a usua i le Aso Lua, 6 Aukuso 2013.

1. Tulafono Tau Faaofi o Teuteuga o le Tulafono o isi Iuga a le Faamasinoga e foia ai ni Feeseeseaiga 2013.
2. Tulafono Tau Faaofi o Teuteuga o le Tulafono o Lafoga o Tupe Maua 2013.

TUUINA ATU i lou nei Lima i lenei Aso Gafua 5 o Aukuso i le tausaga 2013.

(Sainia): Tui Atua Tupua Tamasese Efi
O LE AO O LE MALO.”

SAUNOAGA O MALIU

1. *Na faasilasila e le Fofoga Fetalai le tuumalo o le Tofa Hon MULITALO Siafausa, o Le sa avea ma sui usufono mo le itumalo faaalaalafaga o Faasaleleaga Nu.4 i le Palemene Lona XII i le tausaga 1996-2001. Sa avea ma Sui Fofoga Fetalai i le Paeaiga lea. Sa avea foi ma Taitaifono o le Komiti o Mataupu tau Faamasinoga, Leoleo ma Falepuipui, faapea le Komiti o Oloa Gaosia Tulaga Muamua, Mataupu tau Pisinisi, Alamanuia ma Leipa, Komiti o Tulafono Tumau, faapea le Komiti o Iuni ma Faalapotopotoga Faa-Palemene.
Na toe filifilia Tofa Hon MULITALO Siafausa i le tausaga 2001-2006, ma sa avea ai o ia ma Minisita mo le Soifua Maloloina.
Sa avea o ia o se sui o le HRPP.*
2. *Na faapea foi ona faasilasila e le Fofoga Fetalai le tuumalo o le Afioga TOOMATA Leota Ropati, o Le sa filifilia e avea ma sui usufono mo le Itumalo Faaalaalafaga o Salega i le Palemene Lona XI i le tausaga 1992-1996.*

6 AUKUSO 2013

Saunoaga o Malii

Sa avea ma Failautusi Faa-Palemene i le Ofisa o le Tausi Mavaega a le Malo i le tausaga 1992-1996. Sa avea foi ma sui usufono o le Komiti o Tulafono Tau Faaofi i le tausaga 1992-1995.

Sa avea o ia o se sui o le Vaega Faaupufai e Puipua Aia Tatau a Tagata po o le HRPP.

Na tutulai filemu le Maota mo le minute e tasi e faaali ai le faaaloalo.

ISI FAASILASILAGA A LE FOFOGA FETALAI

FOFOGA FETALAI: E manatu o lea ua emo le malama i Saa ma ua tini pao le uto e pei o le faiva i vai, o lea foi ua tini tauao le Palemene i leni taeao i paia, o sa ma faiga o le Maota i ona tulaga faalupelupe i le alafai mai o lau Afioga i le Taitai o le Malo ma lau Kapeneta, aemaise lea tala-na-atoa i lau Afioga i le Taitai o le Itu Agai ma sui usufono mamalu uma o le Maota ma le Palemene.

O leni avanoa e momoli atu ai le faafetai aloaia a le Nofoa ona ua tatou taunuu i leni taeao fou. O le aso na faalagi ma o le aso na atofa, tatou te potopoto faatasi ona o le faaauauina o a tatou galuega. Faamalo le onosai, faamalo le faapalepale, faamalo le galulue. Ua mavae foi atuvasa i na aso fono na tatou tuua ai le Maota ae tatou agai atu e faatino galuega, peitai ane, tatou viia pea le Atua ona o le taitaiina mai o lo outou soifua manuia i leni taeao fou.

E ofo alofa atu ma faatalofa atu i tulaga aloaia, afifio maia ma tala mai aao i leni aso. E manatu foi e faapena ona oo atu se faamatalaga i le tapuaiga a lo tatou atunuu Samoa, e faafetai atu i la outou tatalo ma la outou tapuaiga. O le manatu ma le lagona, e oo mai pea le mafanafana ona o lo o outou po pea le fala ma outou sapi ma outou tatalo aua faiva a lau Palemene i leni taeao.

O leni taeao ua tatou faatasi ma le paia ma le mamalu maualuga o Samoa ua ee i ona Tupu ma ona Tamalii ma Failauga, Faletua ma Tausi, Saoao ma Tamaitai, Faauluuluga o Matagaluega aemaise o le fatuaiga tausii i lo outou taotaotua i galuega a le Malo, sagai maia ai o le tai i leni taeao.

O le a faagasolo a tatou galuega ona o le tele o nisi o Tulafono e tataua ona tuuina mai Lipoti a Komiti Filifilia ma a tatou galuega tuua, ua manatu ai o le a papa-aveloa a tatou galuega i leni vaiaso.

Ou te fia faasilasila atu foi ua tatou faatasi i leni aso ma alo ma fanau a lo tatou atunuu i le vaega o autalavou i Matagaluega ma Faalapotopotoga a le Malo o lo o gafa ma leni polokalame, ma o polokalame faaauau lava a le Palemene. E talitonu le faamoemoe o tupulaga lalovaoa o le atunuu, e fai i latou ma Taitai i le lumanai, aua o le matafaioi ma le ioimata o le Palemene o lo tatou tutu pea o le lamapa ma tuu i le tuuga-lamepa.

6 AUKUSO 2013

Isi Faasilasilaga a le Fofoga Fetalai

E alu aso ae sau aso, e a tatou nei a o latou taeao ina ia latou mulimulitai i alafua ma faiga faavae o lo o limataitaiina ai lo tatou atunuu i le faavae mautu o Samoa, aemaise o ana faiga faa-Palemene i Pulega Malo lelei ma le faamaoni.

I lenei taeao, e faafeiloai atu i le paia ma le mamalu i tupulaga talavou a lo tatou atunuu i alo ma fanau, alo mai o le a tatou faagasolo i lenei aso, ia outou mataitu; tutu i le too ma tepa i le ata, silasila i galuega faatino a Taitai o le Malo o Samoa.

TUUINA ATU O PEPA

Na tolaulauina e le Failautusi Pepa nei ua faataatia i luga o le Laulau a Fono. (E tusa ai ma le T.T.48).

1. P.P.2013/2014 Nu.20, Lipoti Faaletausaga a le Iunivesite Aoao o Samoa Iulai 2010-Iuni 2011.
2. P.P.2013/2014 Nu.21, Lipoti Faaletausaga Faalapotopotoga Inisiua Tau Soifua a Samoa mo le Tausaga 2012.
3. P.P.2013/2014 Nu.22, Lipoti Faaletausaga a le Pulega o le Suavai Iulai 2010-Iuni 2011.
4. P.P.2013/2014 Nu.23, Lipoti Faaletausaga a le Pulega o le Suavai Iulai 2011-Iuni 2012.
5. P.P.2013/2014 Nu.24, Lipoti Faaletausaga a le Ofisa o le Pule Faatonu mo le piliota na faamaeaina aso 30 Iuni 2009.
6. P.P.2013/2014 Nu.25, Lipoti Faaletausaga a le Ofisa o le Pule Faatonu mo le piriota na faamaeaina aso 30 Iuni 2010.
7. P.P.2013/2014 Nu.26, Lipoti Faaletausaga a le Matagaluega o Aoga, Taaloga ma Aganuu 1 Iulai 2011-30 Iuni 2012.

TUUINA ATU O LIPOTI A KOMITI FILIFILIA

Na tolaulauina e le Failautusi Lipoti a Komiti Filifilia nei ua faataatia i luga o le Laulau a Fono e tusa ai ma T.T.51(5).

1. P.P.2013/2014 Nu.27, Lipoti a le Komiti o Galuega, Felauaiga ma Siosiomaga i le Tulafono Tau Faaofi o Teuteuga o le Tulafono o Taavale Feoai i Ala Tetele 2013.
2. P.P.2013/2014 Nu.28, Lipoti a le Komiti o Tupe Maua ma Tupe Totogi i le Tulafono Tau Faaofi o Teuteuga o le Faavae (Nu.2) 2012.
3. P.P.2013/2014 Nu.29, Lipoti a le Komiti o Tupe Maua ma Tupe Totogi i le Tulafono Tau Faaofi o le Sueina o Tusi 2012.

Tuuina atu o Lipoti a Komiti Filifilia

4. P.P.2013/2014 Nu.30, Lipoti a le Komiti o Tupe Maua ma Tupe Totogi i le P.P.2012/2013 Nu.92, Fuafuaga Autasi a le Ofisa o le Failautusi o le Fono Aoaofaitulafono mo le 2013-2015.
5. P.P.2013/2014 Nu.31, Lipoti a le Komiti o Tupe Maua ma Tupe Totogi i le P.P.2011/2012 Nu.86, Lipoti Faaletausaga a le Pulega o Tupe Faava o Malo mo le Tausaga Faaletupe 2010.
6. P.P.2013/2014 Nu.32, Lipoti a le Komiti o Tupe Maua ma Tupe Totogi i le P.P.2011/2012 Nu.95, Lipoti Faaletausaga a le Faalapotopotoga o Inisiua tau Soifua a Samoa mo le Tausaga Faaletupe 2011.
7. P.P.2013/2014 Nu.33, Lipoti a le Komiti mo le toe Iloiloga o Tulafono Faatonutonu i SR 2011/12-SR2011/22.
8. P.P.2013/2014 Nu.34, Lipoti a le Komiti mo le Toe Iloiloga o Tulafono Faatonutonu i SR 2011/23-SR 2011/31.
9. P.P.2013/2014 Nu.35, Lipoti a le Komiti mo le Toe Iloiloga o Tulafono Faatonutonu i SR 2012/1-SR 2012/20.
10. P.P.2013/2014 Nu.36, Lipoti a le Komiti o Mataupu tau Faamasinoga, Leoleo & Falepuipui ma Faamasinoga o Fanua & Suafa i le P.P.2012/2013 Nu.4, Lipoti a le Komiti o le Toefuataiga o Tulafono a Samoa i le Tulafono mo i Latou e Suesueina Mafuaaga Lilo o Malu 1959, Lipoti 02/11.
11. P.P.2013/2014 Nu.37, Lipoti a le Komiti o Mataupu tau Faamasinoga, Leoleo & Falepuipui ma Faamasinoga o Fanua & Suafa i le P.P.2012/2013 Nu.93, Lipoti a le Komiti o le Toefuataiga o Tulafono a Samoa i le Tulafono o Komiti Suesue 1964, Lipoti 06/11.
12. P.P.2013/2014 Nu.38, Lipoti a le Komiti o Ofisa o le Palemene i le P.P.2010/2011 Nu.13, Faamatalaga o Tupe o le Penisione mo le Palemene mo le Tausaga Faaletupe Faaiiina aso 30 Iuni 2010.

LAFO A LE KOMITI FAAPITOA MO SUESUEGA

FOFOGA FETALAI: Ou te tapa lau Afioga i le Taitaifono o le Komiti Faapitoa mo Suesuega e tulai mai, lau Tofa Lautafi Selafi Purcell.

Afioga LAUTAFI FIO SELAFI PURCELL (Taitaifono o le Komiti Faapitoa mo Suesuega): Faafetai i lau Afioga i le Fofoga Fetalai. E muamua ona momoli atu le faamalo ma le faafetai i lau Afioga i le Fofoga Fetalai, aua le tatou viiga, le faafetai ma le tatou ifoga ua e tapena aua le tatou va-feagai ai ma lo tatou Faaola i leni taeao i Lona agalelei ua mafai ai ona tatou toe faatasi i leni aso atofaina aua le Fono Aoaofaitulafono.

E faatalofa atu la i leni taeao i lau Afioga faapea foi le Taitai o le Malo ma le Kapeneta. E faatalofa atu i le Afioga i le Taitai o le Itu Agai aemaise foi sui usufono o le Maota nei.

Lafu a le Komiti Faapitoa mo Suesuega

E faatalofa atu foi i Faauluuluga o Matagaluega ua mafai ona tatou faatasi i leni taeao, aemaise foi le faafetai ma le faatalofa aloaia i nisi foi o tupulaga o le tatou atunuu ua sagisagi mai i leni taeao talu ai le latou fia auai ma le latou fia iloa o galuega o lo o taumafai i totonu o le Maota leni.

Ua ou tulai atu lau Afioga i le ava ma le faaaloalo ona o le faatonuga a le Fono Aoaio Faitulafono i le aso 24 o Iuni o le tausaga nei, na faatulai ai le Komiti Suesue Faapitoa o lo o iloilo ina faamaumauga a le sui usufono mo Gagaemauga Nu. 2 na tuuina mai e faamaonia ai tuuaiga e faasaga i le Matagaluega o Tupe Maua. O le faatonuga a le Fono Aoaio, ina ia toe lipoti mai le Komiti Suesue Faapitoa i le aso 6 o Aukuso 2013, o le aso lea.

Lau Afioga i le Fofoga Fetalai ma le mamalu o le Maota, ou te faapea atu ma le agaga faamaualalo ma le agaga faaaloalo, ua le ogatasi le futia ma le umele i le faatonuga a le Fono Aoaio ma se taumafaiga vaivai o lo o galulue ai le Komiti Faapitoa. O se galuega sa faafoliga e faigofie, ae peitai, e i ai lava itu taua e ao ona silasila i ai le Komiti.

O le mea muamua, o le mea moni e le mafai ona tuuina mai e le Komiti se lipoti le atoatoa i le Fono Aoaio o lea e moomia ai se taimi faaopoopo ina ia faauma ai ana saililiga auilili.

O lona lua, e le na foi ma le laina mataupu o lo o faasaga i le sui usufono o lo o aafia i leni mataupu o lo o faagasolo nei i luma o le Faamasinoga, ae e tatau lava ona mataituina e le Komiti nei.

E talitonu ai le Komiti e moomia se isi laolao e faagasolo ai ana saililiga ma iloiloga, ae talia ai pea le faaiuga a le Faamasinoga i le mataupu pei ona silafia. I le tulaga lea ou te tatalo ai i lau tofa faatupu i lau Afioga i le Fofoga Fetalai faapea le Taitai o le Malo, le Kapeneta, faapea foi le Taitai o le Itu Agai ma lena Itu, aemaise foi sui usufono uma o le Maota mo la outou tofa faapalepale e amanaia ai se lafo ua ou faatuina e faapea, ou te faatu le lafo, *Ina ia faaopoopo se tolu masina e faauma ai galuega uma ua faatonuina ai le Komiti Suesue Faapitoa ma ia lipoti mai i le aso 17 Tesema, 2013.*

Ma lou faaaloalo.

Faaluaina e le sui usufono mo Faasaleleaga Nu.4, le sui usufono mo Faasaleleaga Nu.2, le sui usufono mo Sagaga le Falefa ma le sui usufono mo Alataua Sisifo.

Tofa Levaopolo Talatonu (Gagaemauga Nu. 2): Lau Afioga i le Fofoga Fetalai.....

FOFOGA FETALAI: Ia ou te faamalulu atu Saleaula, e le o i ai se tulaga i se felafolafaiga i le mataupu leni, ua uma ona lipotia i lalo o a tatou Tulafono Tumau le lafo ma e leai se felafolafaiga e faia i ai.

O lea ua faatuina le lafo ma ua faaluaina.

Na faamaonia le lafo.

6 AUKUSO 2013

**TULAFONO TAU FAAOFI O TEUTEUGA O LE TULAFONO
O FESOOTAIGA 2013 – faitauga faalua**

FOFOGA FETALAI: Mo le silafia e le Palemene o le Tulafono Tau Faaofi lenei sa faia lona faitauga muamua i le aso 30 o Me 2013.

Tulai mai lau Afioga mo le lē auai o le Afioga i le Minisita mo Fesootaiga ma Faamatalaga Tekonolosi, tulai mai lau Afioga i le Palemia.

Susuga Hon TUILAEPA FATIALOFA LUPESOLIAI AIONO NEIOTI SAILELE MALIELEGAOI (Palemia): Lau Afioga i le Fofoga Fetalai ou te tulai atu ma le agaga faaaloalo e faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Fesootaiga 2013 i lona faitauga faalua ma ou te fia tautala faamalamalama i ai.*

Faaluaina e le Sui Palemia ma le Minisita o Tupe.

FOFOGA FETALAI: Tulai mai lau Afioga i le Palemia e saunoa faamalamalama i le Tulafono.

Susuga Hon TUILAEPA FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai, o le Tulafono Tau Faaofi lenei ua uma lona faitauga muamua, a o le faitauga faalua lenei, ma e faigofie lava le Tulafono. O le Tulafono Tau Faaofi faapitoa e faamanino ma faalatele ai galuega a le Pule Faatonu lea o lo o faafeagai ma le faatinoga o galuega i fesootaiga e tagofia ai ni uiga e feeseeseai ai i latou pe a moomia se fesoasoani, e faapea foi ma le tulaga i ana sailiiliga ma faaiuga e tatau ona fai ma sootaga i auala eseese e faatino ai talosaga tetee i ana faaiuga, e aofia ai le faatonutonu o Tulafono o mea nei o talosaga e faatoai atu ai ni talosaga tetee e le matuia tele, faatasi ai ma le faaceina atu o vaitaimi e faatoai ai talosaga toe iloilo faa-Faamasinoga.

O le Tulafono Tau Faaofi lenei o lea e faatino ai ona tiute faalaufali aua o le isi igoa lena o le Pule Faatonu, o le laufali pe a feeseeseai ni vaega, ona faatoai atu lea i le laufali e aumai sana faaiuga e tuuitiitia ma faaleleia ai feeseeseaiga e tulai mai. E tele lava la ituaiga laufali ia i totonu o le Malo, e pei foi o le Komesina o Sulufaiga o le isi lena laufali. Ia, a alu, alu lava laufali o mea nei ae ua le maua se tasi, ona ave loa lea i le Faamasinoga.

O le faalavelave o mea nei o Faamasinoga o le taugata tele. E matua taugata lava ma e le gata i le taugata a o le fiu e faatalitali e oo lava i le tausaga o Apipa o la lava e faatali isi Faamasinoga. E oo mai nei lava i le taimi lenei o la lava e faatali iuga o nisi faamasinoga. E i ai le faaupuga foi lele o le mea lenei o le justice delay, e le o se faamasinoga amiotonu.

O le tulaga la lena i le Tulafono Tau Faaofi lenei, o le igoa la o le laufali iinei i le Tulafono Tau Faaofi lea o le Pule Faatonu. I luga atu la o le Pule Faatonu e i ai foi le Komisi o Faamasinoga faapitoa.

**Tulafono Tau Faaofi o Teuteuga o le Tulafono o
Fesootaiga 2013 – faitauga faalua**

A alu, alu ua le malilie i latou ua fai i ai le faaiuga ona ave loa lea i luga i le Komisi Faamasino tau Fesootaiga e aumai ai sana faaiuga - e faigofie lava la le Tulafono Tau Faaofi.

E i ai le taimi na faatulai mai ai Kamupani nei e lua o le Digicel ma le SamoaTel, ona faatulaga loa lea o totogi o telefoni. Ona avatu lea o le faaiuga o le Malo i lena taimi ae feeseeseai ai ma misa ai lava, misa ai lava. Ona fai lea o le iuga e faatali se i pasi le Tulafono ma faatu se Pule Faatonu e faia iuga o mea faapea. E i ai lava la taimi e avatu ai faaiuga a le Pule Faatonu, e le fiafia i ai le isi party, a o lea la e avanoa ona o lo o i ai lava auala e mafai ai ona ave i luga i le Faamasinoga lea sa ou taua atu, o le Faamasinoga po o le Komisi Faamasinoga tau Fesootaiga, ma e ave i ai na o mataupu tau fesootaiga. E pei la ona ou faamanino atu le maua e oo i ai le malosiaga o le Pule Faatonu e faasino lea i ana sailiiliga ma faaiuga ua fai, ma le sootaga ma le auala e faatino ai talosaga tetee e aofia ai le faatonutonu faale-Tulafono e ala i le faatoai atu o talosaga tetee e le matuia tele, faatasi ai ma le faaee atu o vaitaimi e faatoai atu ai talosaga toe iloilo faa-Faamasinoga.

O le mataupu lea o le faatulaga o vaitaimi e faatoai atu ai Talosaga Toe Iloilo, e i ai le ituaiga tagata foi lea po o le ituaiga kamupani e faatautala ona fai a latou mataupu. E tiga ona iloa e le fetauti ona ua uma ona fai le faaiuga, ae alu, alu lava toe manao e toe aumai se talosaga. Po o le tulaga foi lea e fai, fai ona toe ave lea i tua o se talosaga, ua fia tausaga ae toe mananao e faaauau. O lea la e i totonu uma i i le Tulafono Tau Faaofi lea le faiga e taofia ai lea faiga faatautala.

Ia manatua foi, e oo foi ia tatou faiga palota, e i ai foi ituaiga mea faapena. E i ai le isi mea na masani ona tupu. E mamao lava le malo o Kome i se faiga palota ae tulua Simi, a o Sione la na o le lua pe lava ana palota. O le mea la sa fai i aso la, ua sau loa le alii lea e tulua fai ia Sione, “Vaai, sau e alu e faalavelave.” Ona ave loa lea o le faalavelave lea ma fai ai le Faamasinoga, a o la e iloa lelei lava e le Faamasino na o le lua lava palota a Sione ae fia afe na malo ai Kome, a o lea ua faaoso e Simi Sione e fai ina ia malo ai ona toe sao ai lea o Simi e alu e toe fai le faiga palota. Ona alu, alu loa lea fai mai le Faamasinoga, se o mea nei o le faatautala. E le tataua la ona toe talia ni mea faapea ae tataua ona i ai se tapulaa, lea la e i ai le 50%. A le oo au palota i luga i le 50% o palota a le tagata lea ua malo, e le mafai ona e molia se isi ona o le tulaga lena i le tele o tagata faatautala i le lalolagi lena. O le tulaga foi lena i le Tulafono Tau Faaofi lena, a oo lava i le taimi lea ua misi le pasi, uma loa, uma pisupo faitalia oe aua leaga e faamaimau ai fua taimi o le Faamasinoga a o la e tele mea taua e tataua ona fai.

E i ai le vaega lea e faatino ai Tulafono faafae o faiga masani o taualumaga ma auala e faatino ai faaiuga o feseeseaiga e faaleleia atili ai e aofia ai le vaega lea o le faafaigaluegaina o tagata.

**Tulafono Tau Faaofi o Teuteuga o le Tulafono o
Fesootaiga 2013 – faitauga faalua**

O le tasi lea vaega lea e faatulai atu i le Tulafono Tau Faaofi ina ia tuu mai pea le pule i le Pule Faatonu na te faafaigaluega ai nisi seia vagana lava le principal, a o tagata la e i luga atu o i latou ia o lo o galulue faakonekarate e alu pea latou i lalo o Pulega faa-PSC. O le tulaga o lo o moomia i i ina ia aua nei taotaomia i lalo le galuega faa-Pule Faatonu, ona e fiu le mea e faatali atu aua o mea ia o tagata faigaluega e tatau ona i lalo o le Pulega a le Pule Faatonu, ae fai lava ma aapa i o i le PSC ma tuai ai galuega fai.

Lau Afioga i le Fofoga Fetalai, tasi lena teuteuga lea o lo o aumai i le Tulafono Tau Faaofi ma e na o le sefulu fa (14) lava nai fuaiupu laiti o lo o avatu, o le matua faigofie lava o lenei Tulafono Tau Faaofi ma ou te ofo pe a i ai se isi e toe tulai mai e fesili.

Lau Afioga i le Fetalai, o le Tulafono Tau Faaofi lena.

FOFOGA FETALAI: Malo faafetai saunoa faamalamalamama i lau Afioga i le Palemia e fai ma sui o le Afioga i le Minisita e ona le Tulafono Tau Faaofi, le Minisita mo Fesootaiga ma Faamatalaga Tekonolosi.

E maitau atu o lea e tutulai mai sui usufono mamalu masalo e le o maua le faamalamalamaga lea na avatu.

Tulai mai le sui usufono mo Gagaemauga Nu.2 e saunoa i le Tulafono Tau Faaofi.

Tofa LEVAOPOLO TALATONU: Faafetai tele lava i lau Afioga i le Fofoga Fetalai mo le avanoa. Sa faalogologo lava foi ma le totoa i le folasaga a le Afioga i le Palemia ma le faamalamalamaga.

Masalo o lea ua oo atu i le 82.5% le famalamalamaga manino, ae toe o nai pasene lava lea e fesili atu ai i le Afioga i le Palemia.

O lenei foi Matagaluega ua leva ona faatuina i lalo o le Tulafono muamua ae sa i ai lava ona lape ona o le leai o se malosiaga i le Afioga i le Pule Faatonu, ma e faafetai i le Tulafono Tau Faaofi ona o lea ua tuuina atu ai malosiaga e faafaigofie ai tulaga uma lava. E pei foi ona tele tulaga faaletonu ua aliae mai i au taaalo ia e laufali ai le Pule Faatonu, ae faafetai o lea ua aumai se Tulafono Tau Faaofi e faamalosi ai le tino o le Afioga i le Pule Faatonu.

Na o le pau lava sina vaega lea lau Afioga i le Fofoga Fetalai, i le tulaga lava i le Tulafono muamua. Sa i ai le manatu e faatulaga ni tausaga e toe totogi ai tupe ia sa faaalu i le faatuina o kamupani ia i mea o investment costs lea sa i ai le manatu pe lima tausaga, pe ono foi tausaga ona toe tuu mai lea i lalo o le tau o telefoni. Aua o le upu moni lava o lea lava tatou te sosolo i le mea e tasi.

O le fesili mulimuli lau Afioga i le Fofoga Fetalai, pe fia la ni cost e avatu i le mamalu o le atunuu e faaulu ai a latou talosaga i le Afioga i le Pule Faatonu i mataupu i a latou faasea ma ni mataupu tetee aua o lea e le o aliali mai iinei, ae masalo ona o lea e mulimuli mai Tulafono Faatonutonu.

6 AUKUSO 2013

Tulafono Tau Faaofi o Teuteuga o le Tulafono o
Fesootaiga 2013 – faitauga faalua

E manaia lava le manino o le tulaga lea ona o la e faafofoga le atunuu i a latou talosaga tetee i le gafatia ma le le gafatia.

FOFOGA FETALAI: Malo faafetai. Tulai mai le sui usufono mo Aana Alofi Nu.3 ona avatu ai lea o le avanoa i le sui usufono mo Faasaleleaga Nu.2.

E te fia saunoa? (*I le sui usufono mo Faleata Sasae o lo o tau tulai mai i luga*).

Oi, ia e faamalie atu - tulai mai le sui usufono mo Faleata Sasae.

Tofa AVEAU TUALA LEPALE NIKO PALAMO (Faleata Sasae): Faafetai mo le avanoa i lau Afioga i le Fofoga Fetalai. E faatalofa atu foi i le paia ma le mamalu o le Maota Fono nei aemaise o alo ma fanau a le atunuu ua mafai ona tatou faatasi aemaise foi o le faafogafogaaga a le atunuu.

E momoli atu le faafetai i le Malo ma le Matagaluega mo lenei Tulafono Tau Faaofi. E pei ona silafia na saunoa le Afioga i le Palemia o le Tulafono Tau Faaofi lea o se Tulafono e toe faaleleia ai nai vaega o le Tulafono tuai. Ae i ai nai mataupu ia e fia tuuina atu e uiga i lenei vaega. O le Matagaluega o Fesootaiga ma Faamatalaga Tekonolosi o se Matagaluega e ese le taua i totonu o Samoa. E le gata i totonu o aoaoga a o totonu o galuega ma so o se vaega o le atunuu e i ai le vaega lea. E i ai la le faafitauli, e le o se faafitauli ae i ai se vaega ou te fia talanoa ai.

O le vaega muamua, o laisene ia ua ave i e o lo o faatinoina vaega ia aemaise lava o le vaega lea i initaneti. Ou te fia talanoa i le tau o le initaneti o lo o i ai nei, a silasila le mamalu o le Maota i le taua o le initaneti i totonu o aoaoga, faalapotopotoga ma so o se vaega. O Samoa e le o se atunuu laititi i totonu o fesootaiga. E mafua ona o le vavalalata o Samoa ma Amerika, Ausetalia ma Niu Sila. O lona uiga e vave foi la ona oo Samoa i le technology la ua i ai atunuu tetele nei, a o le faalavelave lea e i ai o le tuai o tatou i le faatinoina o le initaneti. O lea e tuuina atu ai se manatu, o lea e i ai le laisene lea ua ave i le vaega lea e fai ai taaloga ia o le text to spin.

O taaloga nei e pei lava o le lotto, it's a game e tele tupe e alu ai aua e foliga mai e tele tupe a le tagata e maua i le taaloga lea pe a malo ai, ae a fua i le tupe maua a le kamupani e maua mai ai, o le matua tele lava o le tupe. E le gata i le text to spin a o isi foi taaloga o lo o fai e isi kamupani e pei o le Bluesky ma le Digicel. O lea la ou te toe faafesili atu ai pe le mafai la ona faaoga le vaegatupe lea e maua mai i taaloga nei e subsidise ai le tau o le initaneti ina ia mafai ai ona taugofie i totonu o aoga ma le atunuu.

O le isi vaega o le aia tatau a le tagata pe afai ua uma ona faatau lana telefoni ae avatu lava faatosina ina ia taalo le tagata.

6 AUKUSO 2013

**Tulafono Tau Faaofi o Teuteuga o le Tulafono o
Fesootaiga 2013 – faitauga faalua**

E le afaina la le tagata matua aua e faigofie ona fai lana faaiuga pe taalo pe leai, a o a tatou fanau e tele le incentive e vaai atu ai i le taaloga e \$1,000 le malo, a o lea la ua faatulai mai le Tulafono Tau Faaofi lenei.....

FOFOGA FETALAI: Malie le sui usufono mo Faleata Sasae sei tuu atu le avanoa i le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai, sa fai lava ma ou tilotilo atu i lau Afioga po o afea o le a e faauilavea ai i mea e taua i le tatou Tulafono Tau Faaofi ma mea e le o taua.

E le o taua i le Tulafono Tau Faaofi ni mea ia, o mataupu na e faasino tonu lava i taaloga a le Digicel ma le isi Kamupani lea o le Bluesky. E aoga foi nai mea ia e le talafeagai ma le Tulafono Tau Faaofi la ua faafogafoga mai i ai latou o lo o galulue ai ina ia mafai ona latou tilotilo i ai. E le o aofia i totonu o le Tulafono Tau Faaofi mea ia, ae pau lava le tulaga o lo o talanoa i ai le Tulafono Tau Faaofi o le itu lea i le tagata faigaluega ina ia i ai le paoa i le foia o feeseeseaiga i taofi, ona laufali lea. E pei o le tulaga lena lea ua ou tulai atu ai i se mea e fia faasao, ae ou te le i tulai atu mulimuli e avatu se tali i mataupu ua laga.

FOFOGA FETALAI: Malo; mo le faasaoina o le taimi sei tuu atu le avanoa i le Afioga i le Taitai o le Itu Agai.

Tulai mai le Taitai o le Itu Agai.

Afioga Hon Palusalua Faapo II (Taitai o le Itu Agai): Lau Afioga i le Fofoga Fetalai, faafetai lava mo le avanoa ona o lea ua saunoa manino le Afioga i le Palemia, ae manatua foi o lauga a sui usufono o lauga faalauaitele i Tulafono Tau Faaofi. O lea ua maua le avanoa e avatu ai nisi manatu e fatufatu ai le matafaioi a le Pule Faatonu sei silasila i ai i itu nei.

O lou tulai atu lea ma le faaaloalo lava.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai o le mea e fia faasao.

FOFOGA FETALAI: Malie le Taitai o le Itu Agai, o lea ua maua lou finagalo.

Tulai mai le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegai: Lau Afioga i le Fofoga Fetalai e sao le Taitai o le Itu Agai, o lauga faalauaitele.

6 AUKUSO 2013

**Tulafono Tau Faaofi o Teuteuga o le Tulafono o
Fesootaiga 2013 – faitauga faalua**

A o lauga e agai tonu i le Tulafono Tau Faaofi i mea ia e i totonu o le Tulafono Tau Faaofi pe i ai se mea e aveese po o se mea e fia faaopoopo. A o mea ia e aumai e leai lava ma se vaega o le Tulafono Tau Faaofi o agai i ai.

A vaai i ai, e leai lava ma ni cost o aumai ai. Na o le pau le mea lea e taua o le tasi lena o vaega e ono oo i ai le faaiuga mo le totogiina o cost o faamasinoga e fai aua e incur cost, a o mea ia o taaloga masani a kamupani, ia e le o talanoa i ai latou ia. A pasi loa le Tulafono Tau Faaofi ona o lea o outou e ave i ai ma fai i ai sei faamolemole sei silasila ane lava i le Digicel ma ana taaloga. O le mea lena a outou e fai, a o lauga faalauaitele e agai tonu lava i le Tulafono Tau Faaofi, ae talanoa i le kamupani la e i o i Maluafou.

O le soso atu lena e faamanaia le tatou talanoaga i lenei taeao.

FOFOGA FETALAI: Malie le Taitai o le Itu Agai sei fai atu le tala lea a le Nofoa.

O le tulaga lea e i ai le atugaluga o le ala foi lena na ou tuuina ai le avanoa i le sui usufono e faaauau pea lana saunoaga, a o tatou lauga faalauaitele ua maea le tatou Tulafono Autu na tatou o uma ai i le ogasami lea na asa. O le Tulafono Tau Faaofi lea ua tuuina mai o le Tulafono Tau Faaofi Toe Teuteu e tatau lava la ona agai sao saunoaga a sui usufono mamalu i luga o aiaiga o mataupu toe teuteu. Ae sa ou tuuina pea le avanoa leaga e taua le mataupu lea e saunoa i ai le sui usufono. O lea foi ua saunoa malamalama le Palemia, o lea foi ua faafofoga le Digicel ma le Bluesky e faaoga mai i ai o latou mafaufau i fautuaga ia ua avatu.

O le agaga lena ae malie le Taitai o le Itu Agai ina nei tei ua e toe saunoa faalauaitele aua o lona uiga o le a tatou toe talanoa i le Tulafono atoa ua uma ona pasi. Malie le sui usufono mo Faleata Sasae o lea ua maua lou finagalo, ae agai sao i le matupu ao lea ua talia ma faamau lou finagalo ma o lea foi ua agai le fautuaga i le Digicel ma le Bluesky.

Tulai mai lau Afioga i le sui usufono mo Faleata Sasae e faaauau le saunoaga.

Afioga Hon Palusalua Faapo II: Malie lau Afioga i le Fofoga Fetalai o lea ua e saunoa mai ua uma lauga faalauaitele i le Tulafono Autu, a o le mea lea o le Tulafono Toe Teuteu ma ou te leiloa la po o gafea o le Tulafono Tumau o taua ai e aua nei lauga faalauaitele i le Tulafono Toe Teuteu. O le mea lena lea ou te tulai atu ai aua o la e sao lelei lava le saunoaga ona o lea ua maua le avanoa e saunoa faalauaitele ai aua o lea e aafia ai le atunuu i mataupu ia e pei ona laga e sui usufono. O lea lava foi e i ai le taimi e auiliili ai Tulafono Tau Faaofi e pei ona saunoa le Palemia.

FOFOGA FETALAI: Malie le Taitai o le Itu Agai sei tuu atu le avanoa i le Afioga i le Palemia.

6 AUKUSO 2013

**Tulafono Tau Faaofi o Teuteuga o le Tulafono o
Fesootaiga 2013 – faitauga faalua**

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, e i ai le mea e tau o le relevancy to the debate, e agai tonu mai lava i le taua o le Tulafono Tau Faaofi, a o le mea lea ua tupu o lea ua tuu le Tulafono Tau Faaofi lea e talanoaina a o lea ua agai i Maluafou e talatalanoa ai i le fale o le Bluesky ma latou mea ia e alu atu i le televise. O le mea lena lea sa ou tulai atu ai e aumai oulua na i totonu o le Maota, tatou talanoa i le pepa lea ua faataatia i luma.

FOFOGA FETALAI: Malie le sui usufono mamalu o le a ou toe fai atua le lapataiga lea i le tatou Maota aemaise lava lau Afioga i le Taitai o le Itu Agai. Sei e lauama tootoo mai pe a talosaga atu le Nofoa, a o lea lava e te tutulai mai lava ma e saunoa mai i taimi uma e faafoliga o se faataitaiga le lelei mo sui usufono mamalu uma aemaise o lea e filogia le tatou Maota i leni taeao. O lea e malamalama le tatou mataupu, o lea foi ua ou talanoa i le sui usufono mamalu o lo o saunoa ia saunoa i le tatou Tulafono Tau Faaofi ma ona teuteuga. E le o suia uma pe o soloia le Tulafono Autu. O le agaga lena o le taumafai atu, o lea na malamalama le tuuina atu o le faamalamalama le sui usufono mamalu, ae agai maia e faaiu mai lau saunoaga ua maea lou taimi.

Tofa AVEAU TUALA LEPALE NIKO PALAMO: Faafetai lau Afioga i le Fofoga Fetalai. O le mataupu lea ou te tuuina atu, o le Tulafono Tau Faaofi fou e sui ai nisi vaega o le Tulafono Tau Faaofi tuai. O le Tulafono Tau Faaofi la lea a uma ona ave lea i le Komiti latou te iloiloia. O le manatu la lea e avatu, ina ia silasila totoa le Komiti i vaega ia pe le ono tuu i totonu o le Tulafono Tau Faaofi lea i se vaega. Aua a tagai i le Fuaiupu 7 i le Fuaiupu 15 o le Tulafono Tau Faaofi, o lena e tau mai ai le vaega e faia e le Regulator, e lavea ai ma le faiga o laisene i feeseeseaiga o le tau. O lea la ou te talanoa atu ai, pe faapefea la le aia tatau a le tagata. O lea la e reference lava le mea lea ou te talanoa atu ai, o lea ou te talanoa i totonu o le vaega lea. Ae ui i lea, o le a ou usitaia lau Afioga i le Fofoga Fetalai.

FOFOGA FETALAI: Malo. Aua e te faalogogata pei o le Taitai o le Itu Agai. Tuutuu mai lou agaga i le mea lea ou te taumafai atu ai ona lelei lea o le tatou Fono.

Tofa AVEAU TUALA LEPALE NIKO PALAMO: Ona pau lena o nai manatu e tuuina atu i luma o le Fonotaga, o itu na se i silasila ane i ai i le tau o le internet ma le faatinoina o galuega ia e ono afaina ai, e le gata i le aia tatau, o le soifua o alo ma fanau aemaise ni feeseeseaiga i le va o tagata taitoatasi ma kamupani tetele e pei ona saunoa le Palemia aua e le mafai e se isi o tatou ona alu e sue le vaega lena aua e tele tupe.

Ma le faaalalo lava.

6 AUKUSO 2013

**Tulafono Tau Faaofi o Teuteuga o le Tulafono o
Fesootaiga 2013 – faitauga faalua**

FOFOGA FETALAI: Malo faafetai lava saunua. Toe toatasi lava le sui usufono. Se i onosai mai lau Afioga i le Palemia. Malie lau Afioga toe toatasi lava le sui usufono toe o le sui usufono mo Faasaleleaga Nu.2. Ia, tulai mai le sui usufono mo Faasaleleaga Nu.2, ona avatu ai lea o le tali a le tatou Malo.

Susuga PAPANII LIO FAAVAIVAIOMANU TAEU MASIPAU (Faasaleleaga Nu.2): Faafetai i lau Afioga i le Fofoga Fetalai faapea foi le paia o le Maota. E momoli atu le faafetai i le Afioga i le Palemia mo le faamalalamalamaina o lenei Tulafono Tau Faaofi. E leai, o lou foi sui usufono e lagolagoina lava le manatu o lenei Tulafono Tau Faaofi. E aoga, e taua, aemaise foi o le malosiaga o le Pule Faatonu ina ia faafaigofie ana galuega, aemaise foi o ni manatu faatoai atu i le Pule Faatonu. E leai na o se tilotilo lava ma se fautuaga mo le agai i luma. Ou te talitonu lava o lea ua saunua le Palemia i le Komisi lea o Faamasino ma le Tribunal, mo le agai i luma, aua e talitonu tatou te mataituina lava le faagasologa, aemaise foi o le faaaogaina o tatou tupe. Aua ua maua lava e toalua consultant mai fafo lea e i totonu o lenei Komisi. Ia, e leai o se fautuaga lava e faataatia atu mo le agai i luma, pe leai se taimi e agavaa ai o tatou tagata mo lenei vaega taua, ina ia agai tonu foi faamanuiaga i o tatou tagata.

O le tulaga i faamasinoga, o lea ua saunua le Afioga i le Palemia i tulaga ia pei ona – e pei lava e le o le agaga lea sa i ai, e le o le mafuaaga lea na ala ai ona aveese ma le faamasinoga, ona o le le mafai ona totogi pili a loia. E pei o se tulaga faapena na aveese mai ai, ae faafetai o lea ua faatu lenei Komisi. Ae talitonu lava, a fuafua foi i ai, o tatou loia lava o iinei i Samoa, ae o tagata mai fafo. E pei o se tulaga faapena, ae o le vaai i le lumanai, ia faataatia atu pea i ina i lau Afioga i le Palemia ma le Kapeneta, ma le Malo e silasila totoa pea i ai mo le agai i le lumanai. Ma le faaaloalo lau Afioga i le Fofoga Fetalai.

FOFOGA FETALAI: Malo saunua i lau Afioga i le sui usufono mo Faasaleleaga Nu.2. Ia tulai maia lau Afioga i le Palemia e talifuaiteu ona tuuina atu ai lea o le fesili.

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai, o le mataupu lea sa laga, ou te manatua ai lava le fusuaga a le isi toalua i taaloga sa faia a Aferika i Saute ma Ausetalia. E umi lava le taaloga o alu, e taalo leaga lava le isi tama o le forward a Aferika i Saute, taalo leaga, taalo leaga, ae o la e le o faia i ai e le laufali se mea. O la e foi la e ita i ai le laufali, a o le faalavelave, o la e saili lava e le laufali se mea e patino i ai e tuli ai i tua.

6 AUKUSO 2013

Tulafono Tau Faaofi o Teuteuga o le Tulafono o
Fesootaiga 2013 – faitauga faalua

Ia, tui sese loa e le Ausetalia ua le lava onosai, sau loa le tama Ausetalia lea fesili i le laufali, “Se faamolemole lava, o le a le mea ua tuli ai au?” Fai mai le tali a le laufali, ‘ua ou tulia oe ona o lou tuia o le tama leaga le la a Aferika, sa ou faapea lava o le a tasi lau tui oti, a o lea ua ou vaai atu, e le ila le tama, o le mea la lena ua tuli ai oe i fafo ona o le le ila o le tama.”

O le tulaga i le mataupu lenei o le laufali po o le Pule Faatonu, o lea ua uma ona ou auiliilia atu le Tulafono Tau Faaofi Toe Teuteu lenei e faatonutonu ai lana galuega ina ia amiotonu, ia fair le faatinoga o lana galuega ia i latou uma lava e aafia i ana faaiuga. O lea foi la o lo o avatu ai ma le vaega lea e mafai ai ona ave talosaga i luga i le Komisi o Faamasino Tau Fesootaiga, o le faamasinoga faapitoa lava lea mo le Pule Faatonu, e vave ona faatino. O lea la e aumai ai le fesili i le tau. E leai lava ni mea o taua i le tau, se i vagana la le taimi lenei a o faatino galuega, o lea la na o le pau le mea lea e agai i ai o le tau, o le talosaga i le tulaga o ni faamasinoga e ave i luga i le Komisi o Faamasinoga e \$100,000 le deposit. A o le Tulafono Tau Faaofi lea, na pau lava le mea lea e talanoa atu ai, a totogi loa le \$100,000 e le mafai ona toe faaolaina atu le \$100,000.

Ia manatua la, o mea faapenei, o va o kamupani lea tatou te talanoa ai, o kamupani foi nei mau tupe. Ia outou manatua foi, o kamupani nei lea e i ai nei, tasi nei kamupani o lo o fesoasoani tele i le faatupega o tatou taaloga lea e alu i ai talosaga, ona o le tulaga lena o lea e lava seleni o lo o faatino ai a latou fuafuaga. O le mea lea na aumai ai le fesili e faapea sa tataua ona i le va o le lima i le 60 tausaga ona faatoa tuu lea i lalo o le tau, e faale o manino tele, e pei o le fesili i le vai piriota lea, ia faamaualuga pea le tau. E lelei la aua e le o malamalama, o le \$100,000 lea e i ai, ua matua maualuga lava, e le o maualalo.

Tofa Levaopolo Talatonu: Lau Afioga i le Fofoga Fetalai, o se mea e fia faasao.

FOFOGA FETALAI: Ia, e le i uma atu le faamalamalamaga, e lelei lava le tuu mai se i uma atu le faamalamalamaga, ona saunoa mai lea. O le a le mea e fia malamalama ai?

Tofa Levaopolo Talatonu: Ona o lea ua saunoa tonu le Afioga i le Palemia e le i malamalama tele i le uiga o lau faamatalaga.

FOFOGA FETALAI: Ia, tulai maia le sui usufono, faapuupuu mai lau saunoaga.

Tofa Levaopolo Talatonu: Masalo o le Tulafono na i ai i lau fua i ai, e le o i ai se malosiaga o le afioga i le Pule Faatonu i le taimi na tuuina atu ai proposals na te talia ai.

**Tulafono Tau Faaofi o Teuteuga o le Tulafono o
Fesootaiga 2013 – faitauga faalua**

Sa tatau ona i ai se mea lea a uma le taimi po o se piriota faapitoa e toe pay uma ai se cost faapitoa o le faapipii ina ma tulaga faapena, ona i ai lea o se tulaga e pau ai le tau o telefoni. Peitai, o le taimi nei, o lea lava tatou te sosolo i le mea e tasi.

FOFOGA FETALAI: O lea ua maua le sui usufono mamalu.

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI: O lea la ua ou malamalama, ua atili ai ona tele le faaletonu o le mataupu a le Itu Agai.

E pei e foliga mai i le va o le lima i le onosefulu tausaga, aua lava ne i tuua i lalo telefoni, ia matua tuu i luga le tau. Alii o le mea lea na ala ai ona fai le tauvaga ma Faatonu. O le mea moni lava, e leai lava se tau o se telefoni o maualalo. Pe lua sene le maualalo, e i ai lava le tagata e sau fai mai, oka, oka, sa tatau ona sene. Ae i ai foi nisi e fai mai, sa tatau ona fai fua. E leai lava se tau i le lalolagi lenei e maualalo, e maualuga uma lava tau. O le mea la lea, e faamalie atu e leai se kamupani i le lalolagi e ola i le mea lea e te fai mai ai, na o kamupani pepe e tulai mai ai.

O le tulaga lea sa aumai i le tau o le internet, o le faafitauli tele lava lea e feagai ma tatou o laina i fafo. A outou manatua pe a ma le iva tausaga talu ai sa pepe ai a tatou telefoni mo le lua vaiaso. E leai lava se telefoni na toe alu i fafo. A o le mafuaaga, ua matua confuse atoa luga ua matua feomia le anoano o le mau masini nei i luga o satellite communication, ua leai ni avanoa. O le mea la lena na taumafai ai loa e uunai tatou, e le toe faalagolago tatou i satellite communication, ua tatau loa ona alu tatou i ring cables. O ring cables, e sili atu ona faatuatua ina toe televave le taunuuga o au messages e ave ai. E le gata i le televave ae toe sao foi. A o mea ia o satellite communication, ua tele naunau satellite ua tauva i ai le tele o atunuu. O le laina la lea e alu i lalo o le sami, lea sa tatou galulue faatasi ai ma Amerika Samoa.

O le laina la lena, e le toe umi ona uma lea o le aoga. O lea foi la ua toe fai ai isi fuafuaga e i ai laina ia tatou te faatalanoaina i le taimi lenei ma le va o Tonga ma le va o Fiti. O lea la ua tau mai, ua uma foi ona fai le iuga a le Kapeneta e alu loa tatou faatasi i le laina lea e oso atu i Fiti ona e taugofie. E taugofie Tonga i le capital cost, le tupe faavae, ae a oo loa ina faagaioi ona taugata loa lea o Tonga. A o le fesootaiga a tatou i le laina lea e alu atu i lalo i le taele o le sami e agai atu i Fiti, e taugata laitiiti atu le tupe faavae, ae o le faagaioiiga e sili atu le taugofie i le agai atu i le lumanai. O lena la lea tatou te agai ai, ae o lea foi sa felogonai ma Amerika Samoa, ua i ai le faamoemoe i le kamupani lea e faagaioia nei le laina lea tatou te o faatasi ai ma Amerika Samoa, o le a latou toe faafouina, ma e ono alu ifo i lalo le tau. O le mea la lena o lea e taugata ai internet, o fesootaiga nei i fafo e taugata tele laina ia tatou te faaogaina, o le mea foi la lena o lea tatou te moomia ai nisi laina i le tulaga lava lea o le faatauva.

6 AUKUSO 2013

**Tulafono Tau Faaofi o Teuteuga o le Tulafono o
Fesootaiga 2013 – faitauga faalua**

A tele le faatauva, ua faapena foi ona taugofie, ma e leai se isi mea e sili atu ona faamatala faigofie ai le iuga ma le taua o le faatauva nai lo le faatauva lea e fai nei a le Blue Sky faapea foi ma le Digicel, tauvaga tutusa. E muamua atu a o le i suia mai le SamoaTel i le Blue Sky, sa fai lava na o le Digicel, ae fai si tuai laitiiti o le SamoaTel ona o le pulega lea sa i ai o tatou lava. Ia omai loa tama e atamamai e maai faiai i le faatinoga o le tauvaga, o lea la ua taugofie ai tatou telefoni. A o le mataupu lava ia i le internet, o le mea lena o lea o lo o galue pea i ai, ma o le mataupu o lo o aumai e le sui usufono mo Faleata Sasae, o se mataupu o lea e faafeagai pea ma le tatou Matagaluega, ma o le agaga foi lena o lo o taumafai i ai ina ia taugofie le internet.

Lau Afioga i le Fofoga Fetalai, o le Tulafono Tau Faaofi lena.

FOFOGA FETALAI: Malo - faafetai saunoa faamalamalama i lau Afioga i le Palemia.

Na faamaonia le lafo ma faitauina le Tulafono Tau Faaofi o Teuteuga o le Tulafono o Fesootaiga 2013 i lona faitauga faalua.

FOFOGA FETALAI: E tusa ai ma TulafonoTumau o le a tuuina atu le Tulafono Tau Faaofi i le Komiti o Mataupu tau Aoga, Saienisi, Fesootaiga ma Faamatalaga Tekonolosi mo le iloilo ina ma toe lipoti mai i le FonoAoa o se Fonotaga o lumanai.

**TULAFONO TAU FAAOFI O LE SOLOIA O LE TULAFONO
O LE FAALAPOTOPOTOGA O OLOA TAU FAATOAGA 2013
– faitauga muamua**

FOFOGA FETALAI: O lo o i ai le lafo i lalo o le suafa o le Minisita o Tupe e uiga i le Tulafono Tau Faaofi lena. Se i tulai mai lau Afioga i le Minisita o Tupe.

Afioga Hon FAUMUINA TIATIA FAAOLATANE LIUGA (Minisita o Tupe): Lau Afioga i le Fofoga Fetalai ou te faatu le lafo, *Ina ia faaui mai i tua le Tulafono Tau Faaofi o le Soloia o le Tulafono o le Faalapotopotoga o Oloa Tau Faatoaga 2013 ona o nisi mafuaaga le maalofia.*

Faalua ina e le Minisita mo Tina ma Tamaitai, Atinae o Nuu ma Afioga ma Agafesootai.

Na faamaonia le lafo mo le toe faaui i tua o le Tulafono Tau Faaofi o le Soloia o le Tulafono o le Faalapotopotoga o Oloa Tau Faatoaga 2013.

6 AUKUSO 2013

**TULAFONO TAU FAAOFI O FAIGA ALOAIA E TOTOGI AI
TUPE A LE ATUNUU 2013 – faitauga muamua**

Afioga Hon FAUMUINA TIATIA FAAOLATANE LIUGA: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Faiga Aloaia e Totogi ai Tupe a le Atunuu 2013 i lona faitauga muamua.*

Faaluaina e le Sui Palemia ma le sui usufono mo Faasaleleaga Nu.4.

Na faamaonia le lafo ma faitauina le Tulafono Tau Faaofi i lona faitauga muamua.

FOFOGA FETALAI: E tusa ai ma le Tulafono Tumau o le a faatulaga le Tulafono Tau Faaofi i lona faitauga faalua i le Aso Fono lona tolu e mulimuli mai.

**TULAFONO TAU FAAOFI O APERENITISI 2013
– faitauga muamua**

FOFOGA FETALAI: Tulai mai lau Afioga i le Minisita mo Pisinisi, Alamanuia ma Leipa.

Tofa Hon FONOTOE NUAFESILI PIERRE LAUOFO (Sui Palemia & Minisita mo Pisinisi, Alamanuia ma Leipa): Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Aperenitisi 2013 i lona faitauga muamua.*

Faaluaina e le Minisita o Tupe ma le Minisita mo Tina ma Tamaitai, Atinae o Nuu ma Afioga ma Agafesootai.

Na faamaonia le lafo ma faitauina le Tulafono Tau Faaofi i lona faitauga muamua.

FOFOGA FETALAI: E tusa ai ma Tulafono Tumau o le a faatulaga le Tulafono Tau Faaofi i lona faitauga faalua i le Aso Fono lona tolu e mulimuli mai.

**TULAFONO TAU FAAOFI O LE TEUTEUGA O LE TULAFONO O
ISI IUGA A LE FAAMASINOGA E FOIA AI NI FEESEEAIGA
2013 – faitauga muamua**

FOFOGA FETALAI: Tulai mai lau Afioga i le Minisita mo Faamasinoga ma Pulega Tau Faamasinoga.

6 AUKUSO 2013

Tulafono Tau Faaofi o Teuteuga o le Tulafono o Isi Iuga a le Faamasinoga e Foia ai ni Feeseeseaiga 2013 – faitauga muamua

Afioga Hon FIAME NAOMI MATAAFA (Minisita mo Faamasinoga ma Pulega Tau Faamasinoga): Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Isi Iuga a le Faamasinoga e foia ai ni Feeseeseaiga 2013 i lona faitauga muamua.*

Faaluaina e le Sui Palemia, Minisita o Tupe ma le Minisita mo Tina ma Tamaitai, Atinae o Nuu ma Afioga ma Agafesootai.

Na faamaonia le lafo ma faitauina le Tulafono Tau Faaofi i lona faitauga muamua.

TULAFONO TAU FAAOFI O TEUTEUGA O LE TULAFONO O PULE O VAEGA FANUA 2013 – faitauga muamua

FOFOGA FETALAI: Tulai mai lau Afioga i le Minisita mo Punaoa Faalenatura ma le Siosiomaga.

Tofa Hon FAAMOETAUOLOA ULAITINO FAALE TUMAALII (Minisita mo Punaoa Faalenatura ma le Siosiomaga): Lau Afioga i le Fofoga Fetalai, e avea foi lenei avanoa matagofie ou te fia faatalofa atu ai i lau Afioga faapea le mamalu o le Palemene a le atunuu, aemaise foi o le vaega o Ofisa Sili o Pulega o Matagaluega ma Faalapotopotoga ua tatou faatasi e tauala i le latou pito laau o le faufautua, aemaise foi tupulaga o le atunuu ua mafai ona tatou faatasi i lo latou faamoemoe i le aotauina o Taulumaga o lenei Fonotaga, aemaise foi o le faafofogaaga a Samoa o lo o tapuai mai i le faatautaiga o Fonotaga a Samoa ma le mamalu o le atunuu.

Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Pule o Vaega Fanua 2013 i lona faitauga muamua.*

Faaluaina e le Minisita o Tupe, Minisita mo le Soifua Maloloina ma le Sui Palemia.

Na faamaonia le lafo ma faitauina le Tulafono Tau Faaofi i lona faitauga muamua.

FOFOGA FETALAI: E tusa ai ma Tulafono Tumau o le a faatulaga le Tulafono Tau Faaofi mo lona faitauga faalua i le Aso Fono lona tolu e mulimuli mai.

6 AUKUSO 2013

**TULAFONO TAU FAAOFI O TEUTEUGA O LE TULAFONO O
LAFOGA O TUPE MAUA 2013 – faitauga muamua**

FOFOGA FETALAI: Tulai mai lau Afioga i le Minisita.

Tofa Hon TUILOMA LAMEKO (Minisita mo Tupe Maua): Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Lafoga o Tupe Maua 2013 i lona faitauga muamua.*

Faaluaina e le Sui Palemia, Minisita o Tupe ma le Minisita mo Tina ma Tamaitai, Atinae o Nuu ma Afioga ma Agafesootai.

Na faamaonia le lafo ma faitauina le Tulafono Tau Faaofi o Teuteuga o le Tulafono o Lafoga o Tupe Maua 2013 i lona faitauga muamua.

**TULAFONO TAU FAAOFI O TAUMAFI 2013
– faitauga muamua**

FOFOGA FETALAI: Tulai mai lau Afioga i le Minisita mo le Soifua Maloloina.

Afioga Hon TUITAMA TALALELEI TUITAMA (Minisita mo le Soifua Maloloina): Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Taumafi 2013 i lona faitauga muamua.*

Faaluaina e le Minisita o Tupe, Minisita mo Faatoaga ma Faigafaiva, Minisita mo Punaoa Faalenatura ma le Siosiomaga, Minisita mo Galuega, Felauaiga ma Atinae Eeseese ma le Minisita mo Leoleo ma Falepuipui.

Na faamaonia le lafo ma faitauina le Tulafono Tau Faaofi i lona faitauga muamua.

FOFOGA FETALAI: E tusa ai ma Tulafono Tumau o le a faatulaga le Tulafono Tau Faaofi mo lona faitauga faalua i le Aso Fono lona tolu e mulimuli mai.

**TULAFONO TAU FAAOFI O TEUTEUGA O LE TULAFONO O ISI
IUGA A LE FAAMASINOGA E FOIA AI NI FEESESEEAIGA 2013
– faitauga faalua**

FOFOGA FETALAI: Talu ai ua ou taulimaina le Tusi Faamaonia o le Tulaga Faanatinati ua maea ona sainia e Lana Afioga Mamalu O Le Ao o le Malo i lenei Tulafono Tau Faaofi, o lea o le a sagai atu loa le Fono Aoa mo lona faitauga faalua.

6 AUKUSO 2013

Tulafono Tau Faaofi o Teuteuga o le Tulafono o Isi Iuga a le Faamasinoga e Foia ai ni Feeseeseaiga 2013 – faitauga faalua

Tulai mai lau Afioga i le Minisita mo Faamasinoga ma Pulega Tau Faamasinoga.

Afioga Hon FIAME NAOMI MATAAFA: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Isi Iuga a le Faamasinoga e Foia ai ni Feeseeseaiga 2013 i lona faitauga faalua ma ou te fia tautala faamalamalama i ai.*

Faaluaina e le Sui Palemia, Minisita o Tupe ma le Minisita mo Tina ma Tamaitai, Atinae o Nuu ma Afioga ma Agafesootai.

FOFOGA FETALAI: Tulai mai lau Afioga i le Minisita e saunua faamalamalama.

Afioga Hon FIAME NAOMI MATAAFA: Lau Afioga i le Fofoga Fetalai ma le mamalu o le Palemene, o lenei Tulafono Tau Faaofi toe teuteu e Teuteuina ai le Tulafono Faavae na pasia i le tausaga 2007. O le autu o lenei Teuteuga, o lea e i ai ona Fuaiupu e 12, o le faatulaga ai lea o le Fono Faufautua, o Tulafono Faafae ma nisi o vaega e faaleleia atili ai lea faiga fou i totonu o galuega a le Faamasinoga.

I le faavae mai o lenei Tulafono i le 2007, i le vaaiga lea i le Faamasinoga i le sailia o nisi auala e foia ai feeseeseaiga, e ala mai lea i ni faatalatalanoaga po o ni faafeiloaiga i le va o itu faamasino e saili ai nisi auala e toe teuteu ai pe maua ai se faaleleiga ma manuia ma le faamoemoe ia mafai ona foia se mataupu a o le i oo atu i totonu o le faatinoga mo se Faamasinoga.

Lau Afioga i le Fofoga Fetalai, o lea laasaga i le galuega faa-Faamasinoga, ou te talitonu atonu mo i tatou foi sa i ai i le pasia o lenei Tulafono i le 2007, ou te talitonu o se laasaga aoga lea mo le iloa lea o le maua o ni faaiuga lelei i feeseeseaiga i luma o le Faamasinoga.

Lau Afioga, talu mai le pasia o le Tulafono Faavae i le 2007, sa galue ai le Vasega o Faamasinoga i lalo o le taitaiga a le Faamasino Sili ma le Vasega o Faamasinoga, e toe poupu atili ma silasila i itu e famaopoopo ai lea laasaga fou. O lea ua taatia mai ai le Teuteuga o le Tulafono i lenei taeao, o lea ua mafai ona oo i se tulaga e atoatoa ai le faatinoga o lea ituaiga tautua a le Faamasinoga, aemaise o le faatulai aloaia mai lea o le Fono Faufautua mo le faatulagaina o i latou e saunia ia Tulafono Faafae ma nisi foi o tulaga e pei ona i ai teuteuga i totonu o lenei Tulafono o lo o faamalamalama atili ai le tele o mea ma aia tatau a itu eseese o lo o auai i se mataupu i luma o le Faamasinoga.

Lau Afioga i le Fofoga Fetalai, o se faamalamalamaga puupuu lea o le Tulafono Toe Teuteu.

6 AUKUSO 2013

**Tulafono Tau Faaofi o Teuteuga o le Tulafono o Isi Iuga a le
Faamasinoga e Foia ai ni Feeseeseaiga 2013 – faitauga faalua**

FOFOGA FETALAI: Ia, o lo o avanoa pea se sui usufono e fia saunoa. Tulai mai lau Afioga i le Sui Taitai, o le toe ulutaia le sui usufono mo Falealupo, ua avanoa le Maota mo lau saunoaga.

Afioga Hon AEAU PENIAMINA LEAVAISEETA (Falealupo): Lau Afioga i le Fofoga Fetalai i le ava e tatau ai ou te tulai ai i le pau o le Palemene i lenei taeao.

Ua maea ona molia Laau i Fogaa i le itula ua fano ona o le taua ma le matagofie o le tatou Fonotaga i sui usufono mamalu o le Palemene.

Lau Afioga i le Fofoga Fetalai, ua ou tulai atu ona e lagona i tino matagi lelei ona o se Tulafono aoga ua faaofi mai i le Palemene nei. Faafetai i lau Afioga i le Minisita, faafetai i le Matagaluega o lea ua maua atu e le o se Tulafono na faafuaveta ona fai. E mafua ona ou tulai atu ona e aafia tele lenei itumalo mamao i mataupu nei ma le Tulafono lenei ua aumai ma o se Tulafono taua tele. E tele itu e taua ai ma o le isi itu e taua ai, e faamuamua mai le amanaiaina o a tatou tu ma aga a le atunuu. O le a lea? O le fesilafai, aua o itu na e taua i so o se Faamasinoga, e omai lava ma le manatu o le malo ona lau lea o latou manatu, a sailia loa le malo e leai ni taofi e toe faia, o tulaga masani faa-Faamasinoga e afaina ai. O le taua la i lau maitau atu, e atagia iinei a tatou tu masani e pei ona faataatia atu, le fesilafai, feutagai, fetufaai, fefaasoai, aumaī avatū i se tulaga e foia ai le mea lea o le faamanuaina o lagona ma finagalo. Aua o manua e tupu mai iinei i le maota lea, e afaina ai ma e o lo o lalovaoa o aiga. O le itu taua lena o le aumai. Faafetai i le tofa ua ae.

O le tele foi o Faamasinoga i le valaaulia po o Tuasivi po o le Maota Faamasino i Mulinuu nei, e omai ai i latou i tua mamao ma o le masani lava i se procedural masani, e omai e tapena mai ae toe tolo a tatou Faamasinoga; ia toe o. A o le mataupu lea e soalaupuleina lea e i ai le tagi, o se mataupu faatauvaa.

O isi Faamasinoga, e lua, tolu tausaga o omai ae le oo, ae fai ifo e le umi lava se taimi na tagofia ai. O le a la le mea lea e aafia i i? O le taimi ma le tamaoaiga - money and inconvenience, a? Ae faafetai i le Tulafono Tau Faaofi lea. Aua o le tele lava o mataupu nei e aumai e soalaupule ona fofomalie lea, ona toe fiafia uma lea o itu e lua. E taufai fiafia uma itu e lua aua ua fetufaai i luga o le lagona moni ma le aganuu ma le feavatai, ma le le iloa o sina tamai mea lava lena e misi, ae a tatou fetufaai faapea, o le mea sili lena.

Ia, o le itu taua lea lau Afioga i le Fofoga Fetalai ma le mamalu o le Palemene, o le a le faafualoaina so matou leo, a o lou lava lagona ma le talitonuga, ou te talitonu aemaise e o lo o aafia i le mea lea e mamao o latou afoaga ma iinei, ia omai sii atoa mai manua ma omai e cancel, o, gau le taaloga. O le lagona la o lenei usugafono, e talitonu e ioe uma le Maota ina ia pasia loa nei le tatou Tulafono, alu ai ma le vaega lona tolu leaga e taua, e tatau, e fetau, e lelei mo tagata uma. Faafetai.

6 AUKUSO 2013

Tulafono Tau Faaofi o Teuteuga o le Tulafono o Isi Iuga a le Faamasinoga e Foia ai ni Feeseeseaiga 2013 – faitauga faalua

FOFOGA FETALAI: Malo faafetai saunoa. Malie Saleaula se i avatu muamua i le sui usufono mo Faasaleleaga Nu. 2 na muamua tulai mai, ona avatu lea o le avanoa.

Tulai mai le sui usufono mo Faasaleleaga Nu. 2.

Susuga PAPALII LIO FAAVAIVAIONANU TAEU MASIPAU: Faafetai i lau Afioga i le Fofoga Fetalai faapea foi le paia o le Maota.

E fia faaauauina foi le agaga faafetai i le Afioga i le Minisita mo leni Tulafono Tau Faaofi. E pei foi ona saunoa le tama matua o leni Itu, o le agaga fiafia foi lena ona ua maitau atu, e tasi lea vaega taua aua le tele o taimi alu aemaise foi o le taimi o le Faamasinoga, aemaise foi o le faafaigofie mo o tatou tagata.

E pei lava ona maua i leni Tulafono Tau Faaofi le agaga e pei e ese mai lava i le Faamasinoga o Fanua ma Suafa, e i ai lava i latou ua faapitoa mo le iloilo ina o mataupu tau fanua ma suafa, ae peitai o leni Tulafono Tau Faaofi, e pei e faasino tonu lava i le Faamasinoga Maualuga ma le Faamasinoga Faaitumalo, aemaise lava o mataupu foi ia tau i le va foi lele i civil matters e le o aafia ai soligatulafono. Ina ne i te i ua faapea se isi o le a fai ai ma soligatulafono, a o lea ua manaia leni Tulafono Tau Faaofi o lea ua manino ma faigofie ai mo le atunuu aemaise foi o le taimi alu mo a tatou faamasinoga.

Pau lava o lea ua i luma o le Maota aemaise foi o lea ua maitau atu i le tulaga faanatinati o leni Tulafono, ona o le igoa i le iuga o Faamasinoga, a o lea e maitau atu i le saunoaga a le Minisita, e pei o le tasi lea auala ua saunia e le Matagaluega mo le tuutiitia o galuega fai a le Faamasinoga.

I le maitau atu i ai i le faaupuga o le Tulafono Tau Faaofi lea, e pei a sau loa le iuga, pei o se iuga foi lea o se Faamasinoga ua toe iloilo. Pei o le agaga lena o lea ua maitau atu i ai, meamanu o lea ua i luma o le Laulau a Fono.

Ma le agaga faaaloalo, faafetai.

FOFOGA FETALAI: Malo faafetai i le sui usufono mamalu. Tulai mai le sui usufono mo Saleaula.

Tofa LEVAOPOLO TALATONU: Faafetai tele mo le avanoa; leai e le umi foi se manatu o leni itumalo, ae faafetai i le Afioga i le Minisita ma le Matagaluega mo leni faamoemoe taua.

I le maitau atu i le Tulafono Tau Faaofi lau Afioga i le Fofoga Fetalai, pei o lea e agai tonu i mea o civil cases, ae e i ai sina fautuaga vaivai e moni o lea e i ai le process lea e faatino ai galuega i Faamasinoga po o mataupu i fanua ma suafa, ae e i ai lava le agaga vaivai, pe le mafai ona tuu i ai ma le vaega lena ina ia i ai se isi fuafuaga a le Matagaluega foi lele o le agai i le Resitala e toatasi lava le o lo o faia le process i le taimi leni. O le mea lea e maitauina i le taimi leni, na o se tamai mataupu lava ae omai atoa le nuu, a o lea e talanoa ma se Resitala e toatasi.

6 AUKUSO 2013

**Tulafono Tau Faaofi o Teuteuga o le Tulafono o Isi Iuga a le
Faamasinoga e Foia ai ni Feeseeseaiga 2013 – faitauga faalua**

O lau la tilotilo lau Afioga i le Fofoga Fetalai, o se vaega taugata tele lea i le mamalu o le atunuu, ae a faapea e tuu i ai ma le vaega lea o mataupu faapea o fanua ma suafa, e toatasi lava le Resitala e agai i se alaafaga ma soalaupule ai i tua i o ma mediate ai le latou mataupu, i lo i le agai mai i se mea mamao i le fale Faamasino.

E pei na o se fautuaga lava lena lau Afioga i le Fofoga Fetalai ae le fai ai so matou manatu, faafetai.

FOFOGA FETALAI: Malo faafetai saunoa. Ia malie le sui usufono mo Faleata Sisifo, se i tuu atu muamua le avanoa i se tasi o sui usufono mo Vaimauga Sisifo, Tofa Lefau Harry Schuster ona maua ai lea o le avanoa o le sui usufono mo Faleata Sisifo, tulai mai le sui usufono.

Tofa LEFAU HARRY SCHUSTER (Vaimauga Sisifo): Faafetai i lau Afioga i le Fofoga Fetalai mo le avanoa.

E muamua ona momoli atu le faafetai i le Afioga i le Minisita o le Matagaluega faapea foi le Afioga i le Faaamasino Sili mo le Tulafono Tau Faaofi, ma o se Tulafono Tau Faaofi taua. Pau lava se fautuaga i le Tulafono lea, ua matagofie le Tulafono Tau Faaofi a o le faalauiloaina ina ia faalauaitetele i le atunuu le Tulafono lea, ona e amata mai i se vaitaimi po o le 1994, 1995 sa taumafai lava le Faalapotopotoga a Loia e uunai le ituaiga faaogaina o le vaega lea o le mediation e soalaupule ai eseese i le va o tagata, ae e i ai lava le manatu o tagata lautele foi lea a leai se loia pe le o i le Faamasinoga, e pei e le o se mea moni lea i le fofoina o se faafitauli ma o lo o tumau lava le vaaiga lea. A o le lave la o le vaai lea, e tele le advantage o le tagata e i ai le tupe ae laitiiti le tagata e le lava lana tupe. A o le Tulafono lea e sili atu i lau vaai i le faamasinoga i eseese e talafeagai ai, ona o le fofoina o le mataupu e taatia i le va o e o lo o eseese e taugofie le tau, a e finagalo lava oe e i ai lau loia, ae le faapea a i ai lau loia ona tele atu lea o se advantage ia oe. Pau lava le tulaga e i ai le loia o le ona o le faasoasoina o mataupu i le fofoina o le eseese, a o le eseese e fofo lava i le va o e o lo o eseese.

O lea e momoli atu ai le faafetai i le Afioga i le Minisita ma le Matagaluega. A faapea e talia e le atunuu lautele le faaogaina o le mediation e fofo ai faafitauli, e tele foi le mama o le avega o le a i ai i le Ofisa o Faamasinoga ma o le a tele foi le sefe o le tau o le Faamasinoga, ma o le a faafaigofie ai foi le fofoina o eseese i le va o tagata.

Faafetai i lau Afioga i le Fofoga Fetalai mo le avanoa.

FOFOGA FETALAI: Malo faafetai saunoa i le sui usufono mamalu. Tulai mai le sui usufono mo Faleata Sisifo.

Tofa LEALAILEPULE RIMONI AIAFI (Faleata Sisifo): Faafetai i lau Afioga i le Fofoga Fetalai mo le avanoa.

6 AUKUSO 2013

**Tulafono Tau Faaofi o Teuteuga o le Tulafono o Isi Iuga a le
Faamasinoga e Foia ai ni Feeseeseaiga 2013 – faitauga faalua**

E muamua e fia momoli le faafetai i le Afioga i le Minisita ma le Matagaluega i lenei Tulafono Tau Faaofi ona e atagia ai o lo o agai i luma suiga lelei i le faatinoina o galuega ma le taumafai e fofa faafitauli. O le mea moni o faamaumauga ua tuuina mai i faamasinoga, o le tele o faamasinoga o lo o faatinoina i le taimi nei i vaega uma o le lalolagi, e laitiiti lava sina mea e ala ai ona finau, ae mafai ona soalaupule i le na o sina mea laitiiti lava e e fia faamalamalama.

O le isi vaega, po o fea lava tatou te agai i ai pe e te fia malo, na o le tasi lava le tagata e te malo ai o le loia, ioe, e pei o Papalii. O le mea lea e aoga ai tele fetuunaiga ia ua tuu mai e le Matagaluega.

O le isi mea, e galo i tagata o le lalolagi ona faaoga le misiona a Iesu na afio mai ai, o le mea o le salamo. E te salamo loa ua tataua ona faamagalo oe. A maua oe, faatoese, e pei foi o au. A maua, faatoese, ae aua le maua ae fiapoto aua o le mea lena e ala ai ona oo i le Faamasinoga. A o le tasi lena mea e faamalamalama i tagata, a ua maua oe alu e faatoese. E moni lava e mataga ae le tiga, a o mea aoga na mo le agai i luma.

O le isi mea ae ona pau lava lou popolega i le tatou Tulafono, o le toatele o le Council aua ou te talitonu o i e tataua ona ave i ai family law i family matters foi ia e amata mai i ulugalii. E manaia lava la pe a na o le Faamasino ma se toalua ma la ta loia e faigofie ai, ae afai nei la ua ma vevesi ma lou toalua ma o atu ae ma vaai atu e toaluasefulu tagata la e nonofo mai, e vave lava ona ou toe fai i lou toalua, “Ta o, e iloa uma lava e Samoa le ta mea lea e fai i le toatele la e nonofo mai i o.” E pei o le mea lena e tataua ona faamuamua, pe e le mafai ona.....

Afioga Hon Fiamē Naomi Mataafa: Lau Afioga i le Fofoga Fetalai o le mea e fia faasao.

FOFOGA FETALAI: Malie le sui usufono o lo o saunao, ona o lea ua e agai i le feeseeseaiga ma le faletua a o lea e tau faamalamalama. O le feeseeseaiga a Samoa lea tatou te agai i ai. Afai ua maua oe i taimi uma, maua pea oe, ae aua e te agai....

Tulai mai lau Afioga i le Minisita mo Faamasinoga ma Pulega tau Faamasinoga.

Afioga Hon Fiamē Naomi Mataafa: Lau Afioga i le Fofoga Fetalai, ou te fia fesoasoani atu i vaivaiga o le sui usufono i le toatele o le Fono Faufautua o le a iloa ai fua mea o lona ia aiga. Ae ou te fia faamalamalama atu ma le faaaloalo i le Afioga i le sui usufono, o le Council e nafa ma le faatulagaina o Tulafono Faafoe ma tulaga faapena, a o feiloaiga ia tau i mataupu ia, o lo o i ai le tatou vaega lea o Mediators lea e pei ua sui tulaga i Loia lea e saunao ai lau Afioga, e tele tupe a Papalii ma isi loia ia e manuia ai i faamasinoga. A o sina mea laitiiti lea e fia faamalamalama atu i le Afioga i le sui usufono.

6 AUKUSO 2013

Tulafono Tau Faaofi o Teuteuga o le Tulafono o Isi Iuga a le Faamasinoga e Foia ai ni Feseeseaiga 2013 – faitauga faalua

FOFOGA FETALAI: Malo, ua manino le faamalamalama a le Afioga i le Minisita mo Faamasinoga ma Pulega tau Faamasinoga.

Ia tulai mai le sui usufono mamalu, aua e te toe agai i le Council lea ae faauma mai le saunoaga ua maea lou taimi.

Tofa LEALAILLEPULE RIMONI AIAFI: Faafetai, ae amuia le Afioga i le Minisita e le oo i lea tulaga tatou te i ai ona e manuia lona olaga e le faalavelave i mea faapea, a o au ua ova ma le luasefulu tausaga talu ona faaipoipo, e leai se mea o sese ai.

O le a faauma atu foi ua lava ia lea. Faafetai i lau Afioga i le Minisita mo le Tulafono Tau Faaofi.

FOFOGA FETALAI: Tulai mai le sui usufono mo Faleata Sasae.

Tofa AVEAU TUALA LEPALE NIKO PALAMO: Faafetai i lau Afioga i le Fofoga Fetalai mo le avanoa. E puupuu lava nai mataupu ia e fia momoli atu ai le faafetai i le Afioga i le Minisita ma le Matagaluega i le Tulafono Tau Faaofi.

E pei ona faamalamalamaina leni Tulafono Tau Faaofi, ua lava foi sina malamalama i le Tulafono Tau Faaofi i le galuega ananafi. E i ai lava nai fesili ia e lua ona o lou popolega i le mataupu leni ina nei naunau le Matagaluega e faavavevave vaega ia o faaiuga, ae ono afaina ai le faatinoina o le amiotonu o le Tulafono Tau Faaofi. O le uiga o lou manatu o le faatinoina e mediators nei o le Tulafono Tau Faaofi leni. O le auala e avea ai oe ma mediator e pei ona silafia e umi lava le taimi e aoga ai le loia e alu ai e sue mai auala e mafai ai ona fofu mea faapenei. O lea la ua fai mai le mea leni ona i ai lea o le popolega o lou sui usufono, ina ne i avea le naunautaiga o le Matagaluega e faavavevave iuga o mea faapenei ae ono tulai mai ai ni faaletonu faapenei.

O le vaega lona lua, o le a la le malosiaga o le iuga lea pe afai e soalaupule? E pei ona silafia a ave mataupu faapenei i se faamasinoga, e i ai lava iuga e maumaututu e oo i le faavavau. O lea la ou te fia malamalama ai pe afai e ave le vaega lea o le faamasinoga i le vaega lea, o le a la le malosiaga? E i ai se vaitaimi e tuu atu i ai pe uma nei ona soalaupule ae oo atu i le vaiaso lea toe tupu foi se feseeseaiga? O le a la se puipuiga po o se malosiaga e puipui ai le vaega lea?

O nai mataupu ia e fia tuuina atu i luma o le Afioga i le Minisita ma le Matagaluega. Faafetai lava.

FOFOGA FETALAI: Malie lau Afioga i le Minisita mo Faamasinoga ma Pulega tau Faamasinoga toe toalua lava sui usufono mamalu ia e fia tuuina atu i ai avanoa.

Tulai mai lau Afioga i le sui usufono mo Aleipata Itupa i Luga.

6 AUKUSO 2013

Tulafono Tau Faaofi o Teuteuga o le Tulafono o Isi Iuga a le Faamasinoga e Foia ai ni Feeseeseaiga 2013 – faitauga faalua

Afioga TAFUA MALUELUE TAFUA (Aleipata Itupa i Lalo): Faafetai i lau Afoga i le Fofoga Fetalai, faafetai foi mo manatu ua faaalua e nisi o sui usufono ua tali fuaitai le Afioga i le Minisita. E momoli atu foi le agaga ma pae lagoon manatu o nisi o sui usufono ua maea ona saunoa i le agaga faafetai i lenei Tulafono Tau Faaofi taua ma le aoga. O le Tulafono Tau Faaofi ua lelei ona fuafua mo le auiluma o le atunuu aemaise le tulaga tau faamasinoga. E momoli atu ai lava le agaga faafetai i le Afioga i le Minisita ae faapea foi le Matagaluega mo le silasila mamao.

E tasi lava sina au mataupu ma le faaaloalo lava lea foi sa paia e nisi o sui usufono, o le tulaga lea i le mediation pe mafai ona fai i nuu i tua. O le talosaga lea ma le faaaloalo lava.

O le mea muamua, e faaititia ai tupe alu a aiga o lo o mafatia aemaise lava e pei ona saunoa le sui usufono mo Falealupo i nai nuu mamao, o matou foi i Aleipata e fai foi sina mamao masalo pe lata i le \$10 pe sili atu pe afai e malaga mai i Apia le tagata e toatasi, ae afai o le mediators o tagata pe maua le 20+ po o le 30, e tatau ona iloilo le Matagaluega i se tulaga e malaga ai i nuu i tua.

E le na ma le laina sa masani ona ou vaai i faamaumauga a le Faamasinoga amata mai i le 1907 sa malaga atu lava le Alii Faamasino Sili i le vaitaimi lea o Kovana Solofa i nuu i tua ma alaalfaga e fai ai faamasinoga. E ui lava la ina le lelei iuga o na faamasinoga, ae sa malaga atu lava le Kovana i nuu i tua ma fai ai faamasinoga.

O le talosaga lea ma le agaga faaaloalo. Ia manuia le Fono.

FOFOGA FETALAI: Faafetai. Tulai mai se tasi o sui usufono mo Falealili, Tofa Tusa Misi Tupuola.

Tofa TUSA MISI TUPUOLA (Falealili): Faafetai i lau Afioga i le Fofoga Fetalai mo le avanoa. E momoli atu fou le faafetai tele i le Afioga i le Minisita ma le Matagaluega mo lenei Tulafono Tau Faaofi taua.

O lau fesili o se mea na galo ia te au i le aso ananafi i le talanoaina o lenei mataupu E fia maua sou malamalamaaga i le tulaga lea o le faaaogaina o telefoni ma mea ia o talanoaga e faaaoga ai masini faaeletoroni lea e aumai i le (b) o le Vaega 2 o le Tulafono Tau Faaofi. Po o le a le malosi e i ai le faaiuga a le Faamasinoga e uiga i le faaaogaina o mea nei e ese mai ai i le silasila mai o o atu tagata e tatau ona feutagai.

Ia pei na o le pau lea o se mea e fia malamalama ai lou sui usufono i le faaaogaina o mea nei, po o le a se taua ao le a foi se faaiuga a le Faamasinoga i le tulaga o mea nei o mea pue ata ma tulaga uma faapena e fai ai se talanoaga.

FOFOGA FETALAI: Malo faafetai. O le a lafo atu le avanoa i lau Afioga i le Minisita mo Faamasinoga ma Pulega tau Faamasinoga e tulai mai e tali fuaitau.

**Tulafono Tau Faaofi o Teuteuga o le Tulafono o Isi Iuga a le
Faamasinoga e Foia ai ni Feseeseaiga 2013 – faitauga faalua**

Afioga Hon FIAME NAOMI MATAAFA: Lau Afioga i le Fofoga Fetalai, faafetai tele saunoaga matagofie o nisi foi o mataupu ua laga mai i le Tulafono toe teuteu lenei. Atonu o lea lava ua manino le Tulafono lenei e faasino i le Faamasinoga Maualuga ma le Faamasinoga Faaitumalo ma e i mataupu lava i le Faamasinoga o Fanua ma Suafa pe o manatua e nisi o tatou sa pasia i le tausaga ua mavae le manino lea o le soalaupule o le mediation foi lea e mafai ona faaogaina e le Faamasinoga o Fanua ma Suafa.

O lo o i ai atugaluga i le itu lea ina nei tei ua i ai le naunau e faamama le galuega a le Faamasinoga ona faanatinati ai lea e ala i le auala lea o le mediation. O le agaga lava ia e pei ona i ai le Tulafono faavae o le saili lea o auala esese po o metotia e mafai ona foia ai feseeseaiga. O lea foi ua outou saunoa lava i itu lelei o le mafai ona faatino o lena itu. E ao pea ona ou faamanatu i lau Afioga i le Fofoga Fetalai ma le mamalu o le Palemene, o lenei Tulafono Tau Faaofi ma le faiga lea o lo o faataatia mai ai, e le o i tua atu o le Faamasinoga. O se faiga o lo o faatino i totonu o le Faamasinoga i ala o mea o lo o faagasolo. O lona uiga o mataupu uma lava, e taatia atu loa se mataupu i le Faamasinoga, o lona uiga ua i lalo o le faamalu a le Faamasinoga lona faatinoina. Pe faatino la i auala masani i le finauina lea o se mataupu i le va o loia, pe faatinoina i le auala lea ua faataatia atu i le Tulafono toe teuteu lenei, o lo o i lalo lava o le Faamasinoga ma atonu o le tali foi lea i le fesili o lo o faapea mai po o talafeagai pea le igoa lea ua tatou tuuina atu i le Tulafono Tau Faaofi lenei ma e atonu o le faamatalaga lea o faaiuga lava o faaiuga a le Faamasinoga ao lo o faatino i isi ala ae le o auala masani e pei ona finauina ai nei mataupu i luma o le Faamasinoga i le va o loia e fai ma sui o Itu Faamasino.

O le itu lea i le faalauiloa atu o lenei Tulafono Tau Faaofi, ou te lagona o lea ua taatia mai le atoatoaga o le faamoemoe ma le tapenaga o le Tulafono Tau Faaofi ma o lo o maua atu o lo o autasi le finagalo o le Palemene ma e mafai ona faagasolo lenei Tulafono Tau Faaofi, atonu o le a talafeagai ai foi i lona atoatoaga lenei o le a mafai ona tatala atili ai lea tapenaga mo le silafia e le atunuu aemaise o le faiga o latou filifiliga i auala e faaoo atu ai latou mataupu i luma o le Faamasinoga.

Ou te fiasia tele aua o lea e taulamua alii loia o lenei Maota i le fautuaina e tatau ona tuu atu pea le avanoa i e o le a soalaupuleina po o mediators e faamamaavega foi i lea itu aemaise le itu tau seleni i le finauiga po o le teuteuina o ni mataupu i luma o le Faamasinoga.

Lau Afioga i le Fofoga Fetalai, o lo o faapea mai nisi o sui usufono i le avanoa e mafai ona tuu atu ai i tua le momoliga o lea auaunaga ona sa faapea foi ona mafai ona faatino i le taimi ua mavae. Lau Afioga i le Fofoga Fetalai, ou te manatu o le isi avanoa lelei lea o le faiga lenei o le mediator. Aua e le o saisaitia vaega i le oo atu i luma o le Faamasinoga. O mediator e mafai lava ona faatino i se nofoaga o lo o malilie latou o e o lo o finauina se mataupu.

6 AUKUSO 2013

Tulafono Tau Faaofi o Teuteuga o le Tulafono o Isi Iuga a le Faamasinoga e Foia ai ni Feeseeseaiga 2013 – faitauga faalua

Atonu o lea vaega e ono mafai ona faafaigofie ai ona faatino nisi o nei faatalatalanoaga po o nuu i tua po o se isi nofoga e ese mai ai i le fale faamasino. O lo o i ai le upu foi lea o le flexibility e mafai ona faatino ai feiloaiga ia.

O le faafesili i le faaaogaina o telefoni ma isi auala o fesootaiga faaonaponei. I lou vaai atu i le Tulafono Tau Faaofi ma le laga mai e le sui usufono, o le vaega lea o lo o faasino i gaioiga o le faatinoina o feiloaiga nei.

O feiloga nei e faamaumau mea ma e afai e malilie itu uma sa fai latou telefoni, sa fai latou tala, pe sa talanoa i luga o le computer. A faapea e malamalama itu uma i le faaaogaina o ala tevavave ia e fesootai ai, o lona uiga o lea ua faatauaina lava i totonu o le Tulafono Tau Faaofi lea ma o le isi foi itu lea e faasaoina ai le taimi i e o lo o faatinoina le feiloaiga ma itu o lo o finauina se mataupu i le faaaogaina o auala ia faatelevavave ae ou te manatu o le mea taua o le i ai o le maliega o itu uma i fonotaga ia sa faatino i itu ia sa faafesili mai ai le sui usufono.

Lau Afioga i le Fofoga Fetalai, pei na o le pau ia o nai mataupu sa laga mai. Ou te faafetai atu i sui usufono i le agaga lagolago i le Tulafono Tau Faaofi.

FOFOGA FETALAI: Malo faafetai saunoa i lau Afioga i le Minisita mo Faamasinoga ma Pulega tau Faamasinoga.

Na faamaonia le lafo ma faitauina le Tulafono Tau Faaofi o Teuteuga o le Tulafono o Isi Iuga a le Faamasinoga e Foia ai ni Feeseeseaiga 2013 i lona faitauga faalua.

FOFOGA FETALAI: Ou te manatu o lea ua tatou taunuu tonu i le tatou malologa masani o le taeao. O le a faaauau felafolafoaiga i mataupu o totoe pe a tatou talii mai i le malologa masani.

Na faataatia ese Taualumaga a le Fono Aoao i le itula e 10:45 i le taeao mo lana malologa masani ma toe faaauau i le itula e 11:27 i le taeao.

FOFOGA FETALAI: E i ai le talitonuga ua faafoi lo outou soifua manuia ina ua maua se faasiliga malosia ma ua maea le malologa masani i le taeao sa faapena ona maua ai se taligasua e faafoisia ai le malosia i le tino, le agaga ma le mafaufau e faaauau ai a tatou galuega o le aso.

E momoli atu le faafetai i lau Afioga i le Palemia aemaise le Taitai o le Itu Agai ona o tuleiga ma saunoaga sa faaiu ai le Polokalame a tamalii ma failauga ma a tatou fanau pele ua tatou faatasi i lenei taeao.

6 AUKUSO 2013

**Tulafono Tau Faaofi o Teuteuga o le Tulafono o Lafoga
o Tupe Maua 2013 – faitauga faalua**

O le agaga ma le faamoemoe o le faalauiloa o Polokalame a le Palemene, ina ia tuituli matagau pea le ufi a Sina ma nofo fale ia Satuiamaa i aai o finagalo o tupulaga lalovaoa o le atunuu pe afai ae tulai mai i o latou taimi i upufai o Malo, aemaise o le vaalauina e fai ma Taitai o le atunuu i le lumanai.

O lenei itula faafetai i upu timai ma upu faaleaiu. Ou te talitonu ua lagona ma avea o se oso sili mo latou i lenei taeao i lo latou faatasi mai i lenei taeao fou.

E faia le tatou malologa ua pasia nisi o faamalamalama a Afioga i Minisita i le taimi ua sola. O le a tatou faagasolo loa e pei o le tatou polokalame ua faatulagaina.

**TULAFONO TAU FAAOFI O TEUTEUGA O LE TULAFONO O
LAFOGA O TUPE MAUA 2013 – faitauga faalua**

FOFOGA FETALAI: Talu ai ua ou taulimaina nei le Tusi Faamaonia o le Tulaga Faanatinati, ua maea ai ona sainia e Lana Afioga Mamalu O Le Ao o le Malo lenei Tulafono Tau Faaofi, o lea o le a sagai atu loa le Fono Aoa o lona faitauga faalua.

Tulai mai lau Afioga i le Minisita mo Tupe Maua.

Tofa Hon TUILOMA LAMEKO: Lau Afioga i le Fofoga Fetalai faapea sui usufono mamalu o le Fono Aoa Faitulafono, ua maea ona palega auau le taliga o le sua o le faamalositino a lau Afioga i le Fofoga Fetalai faapea foi le Palemia ma Minisita o le Kapeneta, aemaise o sui usufono mamalu o le Fono Aoa Faitulafono. Ou tetaitonu foi o lo o faapea ona tapuai mai Lana Afioga Mamalu o le Ao o le Malo faapea tulaga maualuluga o le tatou atunuu.

O lea ua ou tulai atu ma le faaaloalo e fofogaina le mamalu o le Fono Aoa Faitulafono i le tulaga o le Tulafono Tau Faaofi ua i ai nei...

Lau Afioga i le Fofoga Fetalai, e pei ona silafia...

FOFOGA FETALAI: Se i faatu muamua mai le lafo ona fai ai lea o lau saunoaga faamalamalama.

Tofa Hon TUILOMA LAMEKO: Lau Afioga i le Fofoga Fetalai, ua ou tulai atu e faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Lafoga o Tupe Maua 2013 i lona faitauga faalua ma ou te fia tautala faamalamalama i ai.*

Faaluaina e le Sui Palemia, Minisita o Tupe ma le Minisita mo Tina ma Tamaitai, Atinae o Nuu ma Afioga ma Agafesootai.

**Tulafono Tau Faaofi o Teuteuga o le Tulafono o Lafoga
o Tupe Maua 2013 – faitauga faalua**

FOFOGA FETALAI: Ia, tulai maia lau Afioga i le Minisita e saunua faamalalalama i le Tulafono Tau Faaofi.

Tofa Hon TUILOMA LAMEKO: Lau Afioga i le Fofoga Fetalai, ua uma ona faalupe atu le mamalu o le Fono Aoaofaitulafono. Ae i le Tulafono Tau Faaofi leni ua i luma o le mamalu o le Fono Aoaofaitulafono, e pei ona silafia i le agai i luma o le atinae o le tamaoaiga o Samoa, ua ave lava le faamuamua i le atiaaina o tagata tafafao ma mea tau faletalimalo. Ma o le agaga foi lea o le Tulafono Tau Faaofi leni ua i luma o lau Afioga ma le mamalu o le Fono Aoaofaitulafono, o le teuteuina o le Tulafono 2012.

O le faamoemoe autu o le Tulafono Tau Faaofi, ina ia mafai ona uunaia le mamalu o le atunuu ina ia teu faaagaaga a latou tupe i mea nei o faletalimalo. O le agaga tonu lava lena o le Tulafono Tau Faaofi. E fautuaina, e le gata i le mamalu o le atunuu, a o kamupani ina ia mafai ona teu faafaigaluega a latou tupe i totonu i faletalimalo. Ma e pei ona ou taua, e le o tau fesiligia le tulaga o le tatou tamaoaiga i leni vaitaimi, o lo o tatou faalagolago i le tele o a tatou atinae, a o se isi leni o atinae o lo o ave i ai le faamuamua i tagata tafafao.

Ma e pei la ona taua i le – afai e maua se \$100,000 e mafai ona tuuina ma e faaogaina e ave e fai ai sou share i totonu o faletalimalo, o le vaega taua o lo o i ai i le vaega leni lau Afioga i le Fofoga Fetalai, a maua e le kamupani po o le tagata leni e fai le faletalimalo le atiaaina o le faletalimalo leni se faamanuiaga e ala i mea tau lafoga. O lona uiga e mafai ona maua le faamanuiaga i mea tau lafoga o le a – mo se faataitaiga, afai e maua se \$100,000 aua o le saofaga laitiiti o lo o i totonu o le Tulafono Tau Faaofi e mafai ai ona faamanuiaina oe i mea tau lafoga o faletalimalo, e oo i le \$100,000.

O le agaga tonu lava lena o lo o i ai, ia mafai ai. A faapea mo le faamalalamalama i le mamalu o a outou Afioga, a faapea o le faamoemoe o le a invest se \$100,000 i totonu o le... ae uma le tausaga fai le return a le kamupani po o le faletalimalo e aliali mai se tupe mama e \$100,000, i lalo o le Tulafono Tau Faaofi leni, e mafai ona talosaga ina ia le totogia le lafoga. O le agaga lea, ia le totogia le lafoga o le tupe lea na maua. O lona uiga, e tauave mai lea taimi, o le faagaoioiga o le tax credit a le tagata. E pei o le uiga tonu lena o le Tulafono Tau Faaofi, ina ia faamaonia ma uunaia le atunuu, o a latou tupe e maua e ave e invest i mea tau faletalimalo. O le vaega lea e tau o le Tulafono Tau Faaofi, e patino lava i faletalimalo po o fale foi nei e mafai ona faaoga e tagata tafafao mai totonu o le tatou atunuu.

Lau Afioga i le Fofoga Fetalai, o le faapuupuuga lena o le Tulafono Tau Faaofi ua ou tuuina atu i luma o lau Afioga ma le Fono Aoaofaitulafono, ma o le agaga o lo o i ai i totonu, o lea ua toe tuu agai i tua i le lima tausaga ona o le agaga ina ia fesoasoani i alii ma tamaitai o lo o umia faletalimalo i totonu o le atunuu ma faamalasia ai le tamaoaiga. Ma le faaloalo.

6 AUKUSO 2013

**Tulafono Tau Faaofi o Teuteuga o le Tulafono o Lafoga
o Tupe Maua 2013 – faitauga faalua**

FOFOGA FETALAI: Malo. Faafetai saunoa faamalamalama i lau Afioga i le Minisita. Ma e manatu ua atoatoa le faamalamalama e ala i le tatou Tulafono Tau Faaofi. Ia, o lo o i ai sui usufono mamalu e fia saunoa i lenei Tulafono Tau Faaofi.

Tulai mai le sui usufono mo Falealupo.

Afioga Hon AEAU PENIAMINA LEA VAISEETA: Faafetai i lau Afioga i le Fofoga Fetalai, faafetai foi mo le faamalamalama a le Afioga i le Minisita. A o se tamai fesili lava faamolemole, e aafia ai ii so o se isi?

O le uiga o lau fesili, pe aafia ai le vaega foi lea mai fafo? Kamupani tetele foi nei mai atunuu i fafo. A faapea e aafia ai, e le lagolagoina, ae a faapea e i ai se mafuaaga, ona tau mai lea. Faafetai.

FOFOGA FETALAI: Ia, tulai mai se tasi o sui usufono mo Salega, Afioga Afualo Wood Utu Salele.

Afioga AFUALO WOOD UTU SALELE (Salega): Faafetai atu i lau Afioga i le Fofoga Fetalai. Na o sina minute lava pe a tusa ai ma lou finagalo e molimoli atu ai le agaga faamaise o lenei Itumalo i lou sui usufono aemaise foi o se tasi o sui usufono sa saofai i lenei Nofoa ou te saofai ai. E le mafai ona faaluaina lau malelega, ae ona o le tulaga lava ia o lea ua i ai lou avanoa, e faamaise atu ai foi i le Afioga ia Toomata, le Afioga i le Sao, ae le gata foi i lea o le Toafa o Alii ma le mamalu ia Saleutogi. E faamaise atu foi i le masiofo ia Tutulu ona o le valaau paia a le Atua i le tama o le aiga. Faafetai lau Afioga i le Fofoga Fetalai.

Ona ou oo mai lea i le Tulafono Tau Faaofi, faamalo lava. Faafetai tele i le Minisita ona e le o po se lilo, o le vaega lenei o le isi lenei itutino sili ona taua o le tamaoiga o tagata tafafao maimoa mai fafo. O lenei lava e taumafai atu, ma e tele lava lona sao i totonu o tupe maua. Ma o lea e vaavaai ma maitau atu, na o le toe faaauau lava o le tulaga i se agaga ina ia mautinoa ai pea ua saga faatupu pea le agaga foafoa lea i le toatele o le tatou atunuu, aemaise lava la ina ia faatosina mai e aumai a latou tupe pe to mai foi se vaega o le latou tamaoiga e faafaigaluega i lalo o le atinae lea a le tatou atunuu, ina ia mautinoa ua tapue uma le tele o manuia ia ona saga tele ai lava lea o galuega mo le mamalu o le atunuu, aemaise foi o alo ma fanau a le atunuu o lo o fai ae. Ia, o lau lauga la, e puupuu lava, na o le faafetai lava. Faafetai tele lava i le Minisita, ae na o se fautuaga, se i silasila i ai lau Afioga ae toe tuutuu i lalo i le \$50,000 ae a leai, o lea ua ou malie lava i le \$100,000. Ma lou faaaloalo lava. Faafetai.

FOFOGA FETALAI: Malo faafetai. E avatu le avanoa i le sui usufono mamalu mo Aana Alofi Nu.3 e tulai mai.

**Tulafono Tau Faaofi o Teuteuga o le Tulafono o Lafoga
o Tupe Maua 2013 – faitauga faalua**

Afioga TOEOLESULUSULU CEDRIC POSE SALESA SCHUSTER (Aana Alofi Nu.3): Faafetai i lau Afioga i le Fofoga Fetalai mo le avanoa, e faafetai atu foi i le Afioga i le Minisita mo le Tulafono Tau Faaofi. E lua lava nai vaega, ou te talitonu o se Tulafono Tau Faaofi aoga foi lea mo le atinae o Samoa. E auai foi lenei sui usufono i le Tulafono Tau Faaofi.

Ona pau lava le vaega lau Afioga i le Fofoga Fetalai, na o se vaega e fia maua i ai se malamalamaaga i le Afioga i le Minisita ona e i ai se vaega o le Tulafono Tau Faaofi o lo o faailoa mai ai na o first class hotel accommodation. E pei ona silafia foi po o le a tonu le mea e amata ai nei first class, aua o le tele o faletalimalo o lo o i ai i totonu o Samoa, o lalo i le one i le two star. O le three stars lea e gata mai ai le tele o tatou faletalimalo, po o le vaega la lea e amata ai le mea e taua e tatou o first class hotel accommodation. Po o le mea lea e taua e atunuu i fafo, o faletalimalo foi nei ua ausia fetu e lima.

O lona lua lau Afioga i le Fofoga Fetalai, ou te talitonu ona o lea ua maea tapena ma o lo o i ai foi se faanaunautaiga o le tatou Malo ina ia faatinoina lenei Tulafono Tau Faaofi, e i ai foi se – na pau se lagona lau Afioga i le Fofoga Fetalai, pe a toe silasila le Afioga i le Minisita ma nisi foi i le lumanai pe mafai ona taoto atu ma tagatagai foi e le gata i faletalimalo. Ou te talitonu o le tele foi o galuega e faatino e i latou o lo o faapea ona oo mai, o activities po o events ia o lo o faatinoina, e le na o faletalimalo, ae pei o i latou o lo o faia pasi o lo o faapea ona faatinoina ma le tele o nisi activities ia e faaoga e latou o tagata tafafao maimoa mai, e pei ona silafia e tele lava ina omai tagata tafafao maimoa mai ma nonofo i hotel ae leai ni tatou activities, e faigata foi ona oo mai nisi o tagata tafafao maimoa mai. A i ai foi ni tapenaga e le gata i le Malo a o nisi foi o kamupani o lo o faapea ona latou promote ina event, atonu foi e mafai ona tagatagai i ai i lea tulaga e faaleleia atili ai, e le gata ina i ai investment i totonu o faletalimalo, a o isi services uma e mafai ona faaleleia ai tatou tourism industry. Faafetai i lau Afioga i le Fofoga Fetalai.

FOFOGA FETALAI: Malo faafetai. Ia tulai mai le sui usufono mo Faleata Sisifo ona sosoo ai lea ma le sui usufono mo Gagaemauga.

Tofa LEALAILEPULE RIMONI AIAFI: Faafetai i lau Afioga i le Fofoga Fetalai. E le umi foi se manatu ae momoli le faafetai tele i le Afioga i le Minisita ma le Matagaluega aemaise le Malo i lenei Tulafono Tau Faaofi taua tele ua tuuina mai. E tele le sao o nei atinae i le tamaoaga o le atunuu i vaega eseese. E taua ai tele lenei vaega taua ua faalauiloa mai i faletalimalo. Na pau lava ona o lea e faapito augafa i faletalimalo muamua po o vaega foi ia ua approve e le tourism development i le level lea e i luga, ia, pe o le a se silasila i ai i nisi faletalimalo ua leva ona tautua ae o lo o i ai toatuga i lenei taimi i nogatupe ma aitalafu.

6 AUKUSO 2013

**Tulafono Tau Faaofi o Teuteuga o le Tulafono o Lafoga
o Tupe Maua 2013 – faitauga faalua**

Pe le mafai ona tilotilo i se vaega afai ua lotu le tagata ma ua toe manao e invest ai i vaega ia e toe faaola ai, pe le mafai ona i ai se avanoa i le vaega lea, aua tatou te pisa lava i tagata tafafao maimoa mai i fuainumera e omai i luga ma le omai i lalo, ae e mafai lava ona sui overnight le fuainumera o tagata e omai e faatoatele, toaitiiti, toatele, a o le infrastructure po o fale nei e aumau ai pe faamautu ai tagata, ia e taua tele, e lelei a le lava, toe lelei le tulaga maualuga e ausia. O lo o i ai foi le faamama avega a le Malo i nai faletalimalo ia o lo o taumafai pea, ae e aoga foi lea vaega e toe tagai foi i ai ina ia mafai ona toe faaolaola pea ma saga toe faamautu i latou o la ua i ai faletalimalo i lenei taimi, ae ua i ai nai toatuga e mafai ona foia i lou talitonuga.

Ia ma le faaloalo lava, faafetai.

FOFOGA FETALAI: Ia tulai mai le sui usufono mo Gagaemauga Nu. 2, ona sosoo ai lea ma le sui usufono mo Faleata Sasae.

Tofa LEVAOPOLO TALATONU: Faafetai i lau Afioga i le Fofoga Fetalai, e le umi foi so matou manatu, pau lava le mea ua ou tulai ai e faamauina le lagolagoina e lo matou itumalo o le Tulafono Tau Faaofi e pei ona tulai mai ona e taua.

E manaia foi le tulaga lea i le faatosinaina o nisi foi o lo o finagalo e faia lea ituaiga pisinisi o faletalimalo, aemaise foi nisi o investors i le tulaga lea aua le tamaoiga lelei mo le atunuu. Aua e moni lava a \$100,000, ae talitonu lava e le o se tupe tele foi pe a fua i ai i se tupe e ono fanau mai pe a tulai mai atinae faapea.

Ona pau lava se vaega na o se tuualalo vaivai a lenei itumalo, ona ua tele kamupani ma nisi ua fia faia le tulaga lea i faletalimalo, ae i ai lava nai vaega o lo o poloka ai aemaise lava le tulaga i le tofa ma le moe i alii ma faipule, po o nisi foi i tua. Na o se tuualalo i le Afioga i le Minisita mo Tina ma Tamaitai, Atinae o Nuu ma Afioga ma Agafesootai ma le tulaga o nuu ma alaafaga, e manaia ae fai se polokalame foi lea e toe faamalamalama atili ai tulaga nei. O lo o i ai pea le pogisa i nisi o alii ma faipule ua mafua ai ona tulai mai nisi o atinae ua faafaigata.

Ia manatua foi o tagata nei e agai mai pei ona faataua e le tatou Malo mea o investors i totonu o le tatou atunuu, e taua tele ia latou le taimi. E pei o tatou lava ia e fetosotosoai i luga o le aganuu ma tulaga faapena, ae lamatia ai le atinae pei ona taumafai lo tatou Malo e fai aua le tamaoiga. E pei na o sina vaega lea lau Afioga i le Fofoga Fetalai, faafetai.

FOFOGA FETALAI: Malo, faafetai saunoa i lau Afioga i le sui usufono mamalu mo Gagaemauga Nu. 2.

Tulai mai le sui usufono mamalu mo Faleata Sasae.

6 AUKUSO 2013

**Tulafono Tau Faaofi o Teuteuga o le Tulafono o Lafoga
o Tupe Maua 2013 – faitauga faalua**

Tofa AVEAU TUALA LEPALE NIKO PALAMO: Faafetai i lau Afioga i le Fofoga Fetalai ma e puupuu lava se manatu i le Afioga i le Minisita.

E muamua ona faafetai i le Tulafono Tau Faaofi.

O lona lua, pe aisea le mea ua faapito ai lava leni Tulafono i apitaga lea e alu i le numera tasi, ae po o i ai se vaega o leni Tulafono po o se Tulafono tuai o lavea ai le itu lea in ene i te i ua le maua e lou sui usufono. Aua e ao ona i ai se faamanuiaga faapea e ave i nai tagata foi nei o lo o tau atiae a latou fale i luga o matafaga, tagata o lo o taumafai e atiae ina ia taumafai e upgrade aua o nai vaega lava nei e tele ina o i ai tagata tafafao maimoa mai.

O lona tolu, o i ai se faamanuiaga faapenei o ave i tagata ia e saunia mataaga, lea e latou te tapenaina mea nei o mataaga? A sau le tagata tafao maimoa mai e nofo i i le fale lea o le a fai le Five Star Hotel lea faapea e ave i ai le mea lea, ona alu lea matamata i i mea ia e sauna. Po o i ai la se tapenaga faapenei e fesoasoani ai i le atunuu o lo o tapenaina lena vaega o mataaga. E pei o nai motugaafa ia e tuuina atu i luma o le Minisita ma le faaaloalo lava.

FOFOGA FETALAI: Malo. Ia faaiu maia lau Afioga i le Taitai o le Itu Agai, tulai mai le sui usufono.

Afioga Hon Palusalua Faapo II: Faafetai mo le avanoa ma lou faaaloalo. E lua lava au fesili e lua foi laina o au fesili.

O le fesili muamua, pe fia se tupe o fuafua le Matagaluega o le a le maua talu ai le Tulafono leni? E lima tausaga lea o le a ave ai le avanoa aua nisi e omai e teu faafaigaluega a latou tupe? Po o i ai se faiga moomia o fuafuaina e faatatau foi lea i se vaegatupe o le a le maua e le Matagaluega aua atinae a le atunuu ona o le Tulafono leni?

Lua, o le tele ia o faletalimalo o lo o gau. O lea la ua ave le fesoasoani i e tele a latou tupe, a o le taimi nei o la e totogi lafoga a nai faletalimalo nei ae sue se tupe e totogi ai le afaigaluega ma faagaoioi ai le faletalimalo. O tulaga la ia pe e le i silasila le Matagaluega ma lau Afioga i le Minisita i nai tagata nei aua o lea ua ave le fesoasoani ma le faatosina i tagata e tele tupe, a o lo o pagatia nai tagata ia na o e fai faletalimalo, a o lo o taumafai ona o le faaletonu o lo o i ai.

O au fesili ia e lua e fia maua ai sina faamalamalamaga mai lau Afioga i le Minisita, ma lou faaaloalo lava.

FOFOGA FETALAI: Ia tulai maia lau Afioga i le Minisita e talifuaitau, ae tatau pea ona faamanatu atu e le Nofoa tuleiga ma saunoaga i taimi o mataupu faapenei. O le tulaga i avanoa e tuuina atu, o mataupu o lauga faalauaitale, ae le o ni fesili tuusao ona o lena o le a tauau ina vailili le Minisita a o lea e taumafai atu le Minisita e folasia.

6 AUKUSO 2013

**Tulafono Tau Faaofi o Teuteuga o le Tulafono o Lafoga
o Tupe Maua 2013 – faitauga faalua**

O a outou saunoaga faalauaitele, o le taimi timai lena ma ave ai fautuaga, ae e le o le tui fesili o le Minisita i le taimi le tatau.

Ia tulai maia lau Afioga i le....Malie lava lau Afioga i le Minisita, sei tulai mai le Taitai o le Itu Agai.

Afioga Hon Palusalue Faapo II: Lau Afioga i le Fofoga Fetalai ma le faaaloalo lava, o lea foi ua usitaia lou finagalo e faapuupuu ma tuusao, ae aua le lauga faalauaitele. O lau faauigaga i au fesili, o lau lauga faalauaitele lava lena, e lelei le tuusao ia ma faapuupuu ai felafolafoaiga, aua a ou lauga nei faalauaitele, ia e le uma i le aso lenei lau lauga, ma lou faaaloalo lava.

FOFOGA FETALAI: Aua le toe faaaogaina le upu sili, tuu mai a fautuaga ona puupuu lea. Ia tulai maia lau Afioga i le Minisita e tulai mai e tali i finagalo o sui usufono.

Tofa Hon TUILOMA LAMEKO: Faafetai lava, a e lailoa lava e tau faamalamalama lena tulaga faapea o se fesili faigata, e le taulia ia fesili aua o fesili faigofie lava, ia o lea la o le a ou tali atu i ai i mea uma ia na fai mai ai. O le fesili muamua lea na aumai e le sui usufono mo Falealupo, fai mai i mea o ni kamupani pe i ai ma ni kamupani mai fafo pe lavea ai? E tatau ona lavea, vaai i le faigofie, a le lavea o le tele o kamupani ia e omai mai fafo lea e omai e invest a latou tupe ia tatou, aemaise o le mea lea e toe faamalamalama lelei atu ia outou, o mea o income tax exemption mea lea e fai agai i ai le Tulafono.

O lona lua o le tulaga lea e i ai o le sui usufono mo Aana Alofi Nu. 3 faapea, na o mea o first class hotel, o le tatou atunuu lea e agai i luga, ioe, ma o le tiute lava o le tagata ia o le fai o lana pisinisi, a o tagata la e invest i ai, latou te maua faamanuiaga ia pe a faapea e invest i totonu o hotel nei. O lona uiga la, e leai se mea o le a tupu ai fua se tulaga e aliali mai ai ni tulaga e faavasega ai fua ni tulaga, pau le mea e tasi lea e taumafai, ina ia oo uma a tatou hotel i le tulaga lelei, e le mafai ona oo lo tatou tamaoaiga i le tulaga lelei lea e tatou faamoemoe i hotel, pe a le lelei ona faagaioiina. O lona uiga o le tasi lea auala, o lea e fai e laitiiti lava le mea i nai tagata ia e maitaulia e exemption tusa o le tupe o le a le totogia i mea tau lafoga.

O le sui usufono mo Gagaemauga Nu. 2 o lea e faapea mai, pe i ai ni taumafaiga ua taofia e alii ma faipule. E manatu o se upu vaivai tele, e leai se nuu i Samoa atoa ou te talitonu au i ai, o tatou nuu uma lava, ma ua malamalama lelei le mamalu o alii ma faipule i le tulaga o le tamaoaiga la e i ai, ma e ou te le iloa po o ai se nuu o taofia ni a tatou....aemaise mea ia o atinae tetele faapenei ae fai i nuu ia e i ai, aua e maua ai foi galuega a o tatou tagata. E talitonu.....

6 AUKUSO 2013

**Tulafono Tau Faaofi o Teuteuga o le Tulafono o Lafoga
o Tupe Maua 2013 – faitauga faalua**

Tofa Levaopolo Talatonu: Lau Afioga i le Fofoga Fetalai o le mea e fia faasao.

FOFOGA FETALAI: Malie lau Afioga i le Minisita, ia sei faapulapula mai lou finagalo Saleaula po o le a tonu?

Tofa Levaopolo Talatonu: Ia malie lau Afioga i le Minisita ua matuai mamao lava le tulaga lea ua e saunoa i ai ma se manatu vaivai sa tau avatu. Silasila foi, ua tele lava ia tulaga ia e aliali mai i nuu ma alaafaga ia e tau fai ai atinae a lo tatou Malo, ae ona o le lei pupula atili ma lei malamalama atili ia faiga faavae a lo tatou Malo i le faiga o mea ia o atinae ia o hotel, pei o lea e tuai ai ia le faatinoga o a tatou atinae, ae pei o nai mea na e tuai ai. A o le aumaiga o le Tulafono lea e i ai, e manaia tele le faatosinaina. Ae pei o nai vaega na e tau poloka ai a tatou fuafuaga i e le atiaaina o hotels ma mea faapena aua le manuia o le tatou atunuu, pei o le tulaga lena.

FOFOGA FETALAI: O lea ua maua le finagalo o le sui usufono ma le atugaluga, o le tulaga i le poloka o atinae faapenei i le va o nuu ma afioaga. Ma e manatu o lea sa agai lau saunoaga i le fesoasoani a le Matagaluga o Tina ma Tamaitai, Atinae o Nuu ma Afioaga ma Agafesootai.

O le matafaii lava ia a se sui usufono e agai e ave se atinae faapenei i lona nuu, ia o ia uma e folasia faamatalaga ma aiaiga ma tuutuuga ma mea ina ia malamalama uma tagata o le nuu ma latou e faia faaiuga. Ou te manatu, a malamalama lava, ia ua manino foi ma leai se tetee. O le agaga la lena, ona sa ou auai i le tatalaina o le pamu penisini fou foi lea i lou afioaga, sa faaleo ai la le atugaluga lea i le mataupu lea e saunoa ai ma sa ave foi lau tuualalo i le paia o le Maopu ma Aiga e lua ma le Faatufugaga ia Tufuga ma le Fetalai ia Saleaula, e lelei le tou talanoa lelei, e faamalamalama lelei i tociaina le mea o lo o i ai lo latou atugaluga, ia ona manatu lea ma manino ma sao i ama le faamoemoe. A o lea ua maua e le Nofoa le atugaluga o le sui usufono. O lea foi, o le naunau o le Tulafono ia fai ni faalauiloa, o lona uiga a taunuu le au Five Star Hotel lena, o le isi hotel lena o le a manuia i le Tulafono lena aua o le a maua ia exemption o tax e maua.

Tulai mai lau Afioga i le Minisita e faaauau o lea ua manino lea mataupu i le va faafeagai ai o nuu ma atinae.

Tofa Hon TUILOMA LAMEKO: E faafetai atu i lau Afioga i le Fofoga Fetalai, ua ala ona taumafamafa atu se upu, leaga o tatou uma e i totonu o le lio lea, e leai se isi o tatou e le o i totonu o le lio o alii ma faipule o le nuu – ma a faapea e fai, ia ai lava o ni nai mea na o la e tau....e i ai lava eseese o le taofi mai lea taimi ma lea taimi. A o le upu lea na aumai, o le poloka, a poloka o lona e leai se mea e taofi e leai se mea e faia.

6 AUKUSO 2013

**Tulafono Tau Faaofi o Teuteuga o le Tulafono o Lafoga
o Tupe Maua 2013 – faitauga faalua**

O le mea lena o lea e taumafai atu ai, o le agaga lena, leaga o tatou o alii ma faipule i totonu o nuu uma taitasi. O le mea lena o le vaega lena, ua ou vaavaai atu pei na o le pau ia o fesili na aumai.

Lau Afioga i le Fofoga Fetalai, e faaiu atu ai sau faamatalaga e momoli atu le faafetai i lau Afioga i le Fofoga Fetalai faapea foi sui usufono mamalu o le Maota, ona o le....

Afioga Toeolesulusulu Cedric Pose Salesa Schuster: Lau Afioga i le Fofoga Fetalai....

FOFOGA FETALAI: Malie lava lau Afioga i le Minisita, o le a se mataupu?

Afioga Toeolesulusulu Cedric Pose Salesa Schuster: Se faamolemole na ou fesili atu i lau Afioga i le Minisita po o i ai ni faamanuiaga faapenei e ave i vaega foi ia o beach fales, aemaise o vaega foi ia o lo o fai ia mataaga foi ia e o i ai tagata tafafao maimoa mai, faamolemole lava ma lou faaaloalo.

FOFOGA FETALAI: Ia faaiu maia le saunoaga i lau Afioga i le Minisita.

Tofa Hon TUILOMA LAMEKO: E sao la o lea na faafesili mai e uiga faapea na o hotel numera tasi. A lea ua i ai ia criteria e base ai e ave ai fesoasoani lea e i totonu i i, afai e le o lavea i hotel nei, o le latou tiute lava o le o e taumafai. E tele foi fesoasoani nei o lo o ave i hotels nei o lo o tau atiae e le tatou Malo, e le tasi se mea. Ae o lea ua faapitoa i le taimi lenei, le vaai i le tulaga i tatou hotel ina ia tulaga maualuga tatou hotel. Ma le faaaloalo.

E momoli atu le faafetai tele i sui usufono mamalu sa saunoa, ma o se Tulafono Tau Faaofi taua ma e manaia manatu ua faaalia, ma o le a avea foi ma auala e vaavaai i ai le Matagaluega, ina ia i ai se isi toe suiga o le Tulafono Tau Faaofi i se taimi e talafeagai mai lea taimi i lea taimi. Ia manuia lau Afioga faapea le mamalu o le Fono Aoao Faitulafono.

Na faamaonia le lafo ma faitauina le Tulafono Tau Faaofi o Teuteuga o le Tulafono o Lafoga o Tupe Maua 2013 i lona faitauga faalua.

6 AUKUSO 2013

**TULAFONO TAU FAAOFI O TEUTEUGA O LE TULAFONO O ISI
IUGA A LE FAAMASINOGA E FOIA AI NI FEESESEEAIGA 2013
– iloiloga auilili**

FOFOGA FETALAI: Talu ai ua ou taulimaina le Tusi Faamaonia o le Tulaga Faanatinati ua maea ona sainia e Lana Afioga Mamalu O Le Ao o le Malo, o lea o le a sagai atu loa le Fono Aoao i lona iloiloga auilili.

E tusa ai ma le Tulafono Tumau 102, e amata le iloiloga auilili i le Tulafono i lona Fuaiupu 2.

FUAIUPU 2: Ua teuteuina le Fuaiupu 2.

Faamaonia.

FUAIUPU 3: Ua faaofiina le Vaega IIA fou.

Faamaonia.

FUAIUPU 4: Ua teuteuina le Fuaiupu 7.

Faamaonia.

FUAIUPU 5: Ua suia le Fuaiupu 8.

Faamaonia.

FUAIUPU 6: Ua teuteuina le Fuaiupu 9.

Faamaonia.

FUAIUPU 7: Ua suia le Fuaiupu 11.

Faamaonia

6 AUKUSO 2013

Tulafono Tau Faaofi o Teuteuga o le Tulafono o Isi Iuga a le Faamasinoga e Foia ai ni Feeseeseaiga 2013 – iloiloga auiliili

FUAIUPU 8: Ua teuteuina le fuaiupu 13.

FOFOGA FETALAI: O lo o i ai le Teuteuga a le Tamaitai Minisita i le Fuaiupu 8, tulai mai lau Afioga i le Minisita mo Faamasinoga ma Pulega Tau Faamasinoga.

Afioga Hon FIAME NAOMI MATAAFA: Lau Afioga i le Fofoga Fetalai, ou te faatu le Teuteuga i le Fuaiupu 8 e faapea:

“TEUTEUGA:

Ina ia faaofi le upu “talosaga”, i le tuanai ai o upu, “E mafai e se vaega auai i soo se tulaga faafaufautua ona.”

Ma le faaaloalo lava.

Faamaonia le Teuteuga.

Faamaonia le Fuaiupu 8 e pei ona Teuteuina.

FUAIUPU 9: Ua faaofiina le Fuaiupu 13A ma le 13B fou.

Faamaonia.

FUAIUPU 10: Ua suia le Fuaiupu 16.

Faamaonia.

FUAIUPU 11: Teuteuga faatupulaia.

Faamaonia

FUAIUPU 12: Soloaiga.

Faamaonia.

6 AUKUSO 2013

Tulafono Tau Faaofi o Teuteuga o le Tulafono o Isi Iuga a le Faamasinoga e Foia ai ni Feeseeseaiga 2013 – iloiloga auiliili

FUAIUPU 1 MA LE IGOA:

FUAIUPU 1: Igoa puupuu ma le amataga.

IGOA: Teuteuga o le Tulafono i isi iuga a le Faamasinoga e foia ai ni feeseeseaiga 2013.

Faamaonia.

Na faagasolo le Tulafono Tau Faaofi o Teuteuga o le Tulafono o Isi Iuga a le Faamasinoga e Foia ai ni Feeseeseaiga 2013 faatasi ma Teuteuga.

TULAFONO TAU FAAOFI O TEUTEUGA O LE TULAFONO O LAFOGA O TUPE MAUA 2013 – iloiloga auiliili

FOFOGA FETALAI: Talu ai ua ou taulimaina le Tusi Faamaonia o le Tulaga Faanatinati ua maea foi ona Sainia e Lana Afioga Mamalu O Le Ao o le Malo lenei Tulafono Tau Faaofi, o lea o le a sagai atu loa le Fono Aoa o lona iloiloga auiliili.

E tusa ai ma le Tulafono Tumau 102, e amata le iloiloga auiliili o le Tulafono Tau Faaofi i lona Fuaiupu 2.

FUAIUPU 2: Ua faaofiina le Vaega fou.

Faamaonia.

FUAIUPU 3: Soloaiga.

Faamaonia.

FUAIUPU 1 MA LE IGOA:

FUAIUPU 1: Igoa puupuu ma le amataga.

IGOA: Teuteuga o le Tulafono o Lafoga o Tupe Maua 2013.

Faamaonia.

Na faagasolo le Tulafono Tau Faaofi o Teuteuga o le Tulafono o Lafoga o Tupe Maua 2013 e aunoa ma se Teuteuga.

6 AUKUSO 2013

TULAFONO TAU FAAOFI O TEUTEUGA O LE TULAFONO O ISI IUGA A LE FAAMASINOGA E FOIA AI NI FEESESEEAIGA 2013

– faitauga faatolu

FOFOGA FETALAI: Talu ai ua ou taulimaina le Tusi Faamaonia o le Tulaga Faanatinati ua maea ona sainia e Lana Afioga Mamalu O Le Ao o le Malo i lenei Tulafono Tau Faaofi, o lea o le a sagai atu loa le Fono Aoa o lona faitauga faatolu.

Tulai mai lau Afioga i le Minisita mo Faamasinoga ma Pulega Tau Faamasinoga.

Afioga Hon FIAME NAOMI MATAAFA: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Isi Iuga a le Faamasinoga e Foia ai ni Feeeseeseaiga 2013 i lona faitauga faatolu.*

Faaluaina e le Sui Palemia ma le Minisita o Tupe.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoa o Faitulafono.

TULAFONO TAU FAAOFI O TEUTEUGA O LE TULAFONO O LAFOGA O TUPE MAUA 2013 - faitauga faatolu.

FOFOGA FETALAI: Talu ai ua ou taulimaina le Tusi Faamaonia o le Tulaga Faanatinati ua maea foi ona Sainia e Lana Afioga Mamalu O Le Ao o le Malo, o lea o le a sagai atu loa le Fono Aoa o Faitulafono i lona faitauga faatolu.

Tulai mai lau Afioga i le Minisita mo Tupe Maua.

Tofa Hon TUILOMA LAMEKO: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Lafoga o Tupe Maua 2013 i lona faitauga faatolu.*

Faaluaina e le Sui Palemia ma le Minisita o Tupe.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoa o Faitulafono.

6 AUKUSO 2013

ILOILOGA O LIPOTI A KOMITI FILIFILIA

P.P. 2012/2013 NU 30, LIPOTI A LE KOMITI O GALUEGA, FELAUAIAGA MA SIOSIOMAGA I LE P.P. 2011/2012 NU 36, LIPOTI FAALETAUSAGA A LE PULEGA O UAFU MA TAULAGA MO LE TAUSAGA FAALETUPE FAAIUINA ASO 30 IUNI 2010 - ILOILOGA

FOFOGA FETALAI: Tulai mai lau Afioga i le Taitaifono o le Komiti o Galuega, Felauaiga ma Siosiomaga.

Tofa TUSA MISI TUPUOLA: Lau Afioga i le Fofoga Fetalai ma le mamalu o le Palemene, ou te faatu le lafo, *Ina ia faautagia e lenei Fono Aoa le Lipoti a le Komiti o lo o tuuina atu ai ana SAILIILIGA, FAUTUAGA MA IUGAFONO.*

Ma le faaaloalo lava.

Faaluaina e le sui usufono mo Palauli.

FOFOGA FETALAI: Tulai mai lau Afioga i le Taitaifono mo le tolaulauina o Fautuaga ma Iugafono.

Tofa TUSA MISI TUPUOLA: Lau Afioga i le Fofoga Fetalai ma le mamalu o le Maota:

“FAUTUAGA:

I le maea o ana iloiloga na fautuaina ai e le Komiti le tatou Malo ma lenei Palemene:

1. Ina ia fautuaina le Faalapotopotoga ina ia toe iloilo le tau o totogi o vaa mo le faaogaina o uafu ina ia foia ai le faafitauli o le faaitiitia o vaa e taunuu mai i totonu o le uafu ma afaina ai tupe maua e fesoasoani i le faagaioioiga o le pulega o uafu ma taulaga.
2. Faatino ni feutagaiga ma Amerika Samoa, mo ni aiaiga faigofie o fua o faaeleleaga e auina atu mo aiga ma tulaga faapisinisi i Amerika Samoa ina ia fesoasoani ai i le aufaifaatoaga ma le atunuu lautele i le tulaga faigata o i ai nei.
3. Fautuaina le Pulega mo le faatauina mai o se isi masini palolo talafeagai mo galuega i le sami ae faatau ese atu le masini tuai o lo o i ai nei ina ia faasaoina mai tupe faaalu i totoga manaomia ona o le le ausia e le masini o galuega i uafu e pei ona lipotia mai pea e le Pulega.
4. Silasila totoa i aafiaga o le siosiomaga ma le gataifale o le atu Aleipata i galuega faaleleia mo vaa i nofoaga tosovaa i Satitua ona o le le ausia e lea nofoaga tosovaa o aiaiga ma galuega faaleleia o vaa lapopoa ona e le ofi i totonu o le fale o lo o faatino ai ia galuega.
5. Ia silasila totoa le pulega i le faasoasoina o ana tupe maua na o galuega talafeagai mo le saogalemu o uafu ma taulaga.

6 AUKUSO 2013

P.P. 2012/2013 Nu 30, Lipoti a le Komiti o Galuega, Felauaiga ma Siosiomaga i le P.P. 2011/2012 Nu 36, Lipoti Faaletausaga a le Pulega o Uafu ma Taulaga mo le tausaga faaletupe faaiuina aso 30 Iuni 2010
- Iloiloga

IUGAFONO:

I le maca ai o iloiloga a le Komiti na faaiugafonoina ai e fautuaina le Fono Aoao:

Ina ia faamaonia le Pepa a le Palemene 2011/2012 Nu 36, Lipoti Faaletausaga a le Pulega o Uafu ma Taulaga mo le Tausaga Faaletupe faaiuina aso 30 Iuni 2010.”

Ma lou faaaloalo lava.

FOFOGA FETALAI: Faafetai i lau Afioga i le Taitaifono. Ia, e maitau atu e leai se sui usufono e fia saunoa i le tou Lipoti ona ua manino ma malamalama.

Tofa Aveau Tuala Lepale Niko Palamo: Lau Afioga i le Fofoga Fetalai...

FOFOGA FETALAI: Tulai mai la le sui usufono mamalu mo Faleata i Sasae.

Tofa AVEAU TUALA LEPALE NIKO PALAMO: Lau Afioga i le Fofoga Fetalai, faafetai atu i le Taitaifono o le Komiti aemaise foi le Komiti mo le Lipoti. E i ai nai vaega ia o le lipoti o lo o faatulaga mai ii sa i ai le sailiiliga e faapea, e tataua ona toe faaleleia uafu i Salelologa ma Satitua, le uafu lea i Aleipata. Na ona ou faafesili atu ai i le asiasiga, po o le a le tulaga ua i ai le uafu lea i Satitua i le taimi nei po o faaaoga lava pe leai. O lau fesili lona 2 faamolemole ou te fia malamalama ai, o le fautuaga lea lona tolu, lea ua fautuaina ai e faatauina mai se masini palolo, po o le a se tau e faaalu e faatau ai le masini lea, a o a foi ni faafitauli ua i ai le vaega tuai o le masini tuai ua ala ai ona fai le fautuaga lea ina ia aumai se masini, po o ua fai se suesuega a le Komiti po o le a se tau o lea vaega.

O nai fesili ia e lua e tuu atu i lau Afioga i le Taitaifono. Ma le faaaloalo lava.

FOFOGA FETALAI: Tulai maia lau Afioga i le Taitaifono e tali atu i le sui usufono mamalu.

Afioga Hon Palusalua Faapo II: Lau Afioga i le Fofoga Fetalai ona o lea ua maitau atu o le a tali mai le Taitaifono.

FOFOGA FETALAI: Malie lava le Taitaifono se i tuu atu le avanoa i le Taitai o le Itu Agai.

6 AUKUSO 2013

P.P. 2012/2013 Nu 30, Lipoti a le Komiti o Galuega, Felauaiga ma Siosiomaga i le P.P. 2011/2012 Nu 36, Lipoti Faaletausaga a le Pulega o Uafu ma Taulaga mo le tausaga faaletupe faaiiuna aso 30 Iuni 2010
- Iloiloga

Afioga Hon Palusalua Faapo II: Faafetai mo le avanoa ua tuuina mai e lau Afioga i le Fofoga Fetalai ona e taua tele le Lipoti lenei, Lipoti a le Komiti faa-Palemene i le Pulega o Uafu. Atonu o lenei Pulega e tele foi finagalo sa faaalua, e le gata i le Tala Autu o le Tupe, aemaise foi Lipoti Faaletausaga o lo o ua tuuina mai.

O lea e maitau atu o le 2010 lea e gata ai le Lipoti ao le 2013 lenei, a o lea sa ou faapea e aumai i le Lipoti a le Komiti lea tulaga ona o le tuai mai o Lipoti Faaletausaga a le Pulega lau Afioga i le Taitaifono.

O lona lua, o lea e aumai nei e tusa ma le lima Fautuaga o lo o aumai. Se i faapupula mai e lau Afioga i le Taitaifono po o le a tonu le uiga o le mea lea o le toe silasila i totogi o vaa e pipii i le tatou uafu. Po o le mea o le faaitiitia le totogi o vaa e pipii ai i le uafu ona tele lea o vaa e omai i le tatou taulaga? Se i faapupula mai, po o le uiga o le fautuaga e toe tuutuu i lalo ina ia tele ai vaa e omai e aumai a tatou oloa ae manatua lelei o lou talitonuga e le o le tele o le totogi o le pipii o le vaa i le uafu lea e le tele ai ni vaa e omai. Ou te talitonu lava o fuafuaga a kamupani vaa ia e fua i oloa e felauai i le aumai i totonu o le atunuu ma le avatu i fafo aua e fua lava i le tamaoaiga ma le manaomia o oloa. E pei o lou lea talitonuga e fuafua i ai le pipii o vaa i le tatou uafu. O le tulaga i le faamoemoe i totogi o vaa, o mea foi ia e faaeteete foi i ai aua afai e le tele ni vaa e omai ao lea e pagatia le Pulega i le leai o ni tupe e faagaoioi ai le Pulega, ina nei aapa le Pulega i le toe siitia o tau o vaa ona toe tietie foi lea i luga o le atunuu. O le mea lea lau Afioga i le Taitaifono faapea le Afioga i le Minisita, sei silasila ane po o fea tonu e taoto tonu ai le fautuaga lea. Po o le mea e faaitiitia le totogi o vaa, po o le toe siitia i luga ona fafa foi lea i luga o le aufaipisinisi ma faioloa ma iu ane lava ua totogi e le atunuu.

FOFOGA FETALAI; Malie le Taitai o le Itu Agai o lo o saunoa sei tuu atu le avanoa i le Afioga i le Minisita e pulea uafu ma taulaga.

Afioga Hon Manualesagalala Enokati Posala (Minisita mo Galuega, Felauaiga ma Atinae Eseeese): Lau Afioga i le Fofoga Fetalai aemaise le paia maualuga o le fonotaga nei i le Palemia ma le Kapeneta ma sui usufono mamalu uma o le Palemene. O le Lipoti lenei o le 2010 lea sa agai i ai le iloiloga a le Komiti ma ua leva foi ona taoto i totonu o le Palemene ao lea faatoa agai mai. O fuafuaga i vaega ia i tau o vaa ou te iloa o la e manino, sa i ai fetuunaiga sa fai. Ua tele le suiga i vaa meli lea e omai ai tagata tafafao maimoa mai. O le suiga ua i ai o la e ua amata ona tele meli e afea le tatou uafu. Ou te talitonu foi o le suiga lena e tele ai tupe e maua i le uafu i le asiasi mai ma o mai faatau meataulima ma vaega eseese ma le faaogaina o taavale. Ua i ai le suiga i vaega uma ia. O le tulaga i vaa oloa ou te iloa sa i ai le saililiga sa fai, e fai sina pau maualalo o le atunuu i vaega ia.

6 AUKUSO 2013

P.P. 2012/2013 Nu 30, Lipoti a le Komiti o Galuega, Felauaiga ma Siosiomaga i le P.P. 2011/2012 Nu 36, Lipoti Faaletausaga a le Pulega o Uafu ma Taulaga mo le tausaga faaletupe faaiiina aso 30 Iuni 2010
- Iloiloga

O lea foi e i ai le faamoemoe o le Malo e tusa ai ma vaa a le PFL ma vaega uma na e pei o vaega na o le a siitia ai le afea o tatou uafu ao le tulaga i tau ona o nisi suiga i vaa meli ia e afea ma ua mafai ai ona i ai se siitaga i tupe e maua i uafu. E tele sailiiliga sa fai e i ai scoping studies sa faatinoina e le au tomai mai atunuu i fafo ma vaai i vaega e tatau ona faaleleia ai le auunaga ma siitia ai tupe maua e le uafu ma o lo o faatino ia vaega ma ou te talitonu foi e le fausia Roma i se aso se tasi, ao galuega faaauau ina ia mafai ona faatumauina le lelei mo le agai luma.

O le tali atu lea e tusa ai ma le faafesili lau Afioga i le Fofoga Fetalai.

FOFOGA FETALAI: Tulai mai le Taitai o le Itu Agai.

Afioga Hon PALUSALUE FAAPO II: Faafetai o lea ua manino mai lau Afioga i le Fofoga Fetalai le totogi o meli aua o mea ia lea e i ai fesili i lau Afioga i le Taitaifono aua e tatau lava ona faamanino mai aua mea ia o lea e i totonu o le tou Lipoti e pei ona saunoa le Afioga i le Minisita. E le o vaa uma ao lea e faapitoa i meli pei o le tulaga lea na fesili ai ona o le tou fautuaga lea e aumai e pei e faalauaitete i vaa.

Lau Afioga i le Fofoga Fetalai, o le siosiomaga leaga e matua aafia lava. O Aleipata ma Safata sa i ai le polokalame faasiosiomaga ae lei faia le mea toso vaa lea e i o i Aleipata ma ou te molimau atu o se polokalame aupito sili ona taua ona o la ua aea ai le matou itumalo o Safata i le lelei faatino o le polokalame lea, lea sa soosootauau ai ma Aleipata. O le molimau mai a e o lo o fatinoina le polokalame lea aemaise o le komiti, e i ai amu la e i o i Aleipata e le maua tele i Samoa. O amu, o ia, o le matua taua o le siosiomaga ma le polokalame lena ae talu ai nei e tusa ai ma le lipoti e le gata i le le maopoopo o le Komiti ae ua tele foi le faaletonu i Aleipata ona o le mea toso vaa lena. O lea la lau Afioga i le Taitaifono, fesoasoani mai foil au Afioga i le Minisita, sei silasila mamao nei tei ua tatou faamuamua le atinae o mea toso vaa ae afaina ai Aleipata.

FOFOGA FETALAI: Malie lau Afioga i le Taitai o le Itu Agai sei avatu le faamalamalamaga a le Afioga i le Palemia ona faaauau ai lea o le saunoaga.

Susuga Hon Tuilaepa Fatialofa Lupesoliai Aiono Neioti Sailele Malielegaai: Lau Afioga i le Fofoga Fetalai leaga o i e masani ona ou fagota ai i Aleipata. Ou te alu i ai ma lau ofe e togi solo ai leaga ou te sau foi i Aleipata. O lea la ou te vaai atu e le o suia lava malauli la e i ai ma fuga usi. Ou te fia fesili atu po o le a.....o lona uiga e sosola ia ona o le fefefe i vaa? O lona uiga a vaai i se vaa e avatu e toso e manatu o se tafola? O le a tonu lava le mea lea e fefefe ai ia pe a i ai se mea faapena i Aleipata?

6 AUKUSO 2013

P.P. 2012/2013 Nu 30, Lipoti a le Komiti o Galuega, Felauaiga ma Siosiomaga i le P.P. 2011/2012 Nu 36, Lipoti Faaletausaga a le Pulega o Uafu ma Taulaga mo le tausaga faaletupe faaiiina aso 30 Iuni 2010
- Iloiloga

Ou te fia iloa po o le a le mea lea? Sa i ai foi le inisinia na sau mai Filipaina, na moomia e alu atu e vaai le auala lava lea ua iu ina fai, le auala lea e alu atu i uta i Saleapaga e tau i Lalomanu ona o le talosaga a Saleapaga i le taimi lena ina ua uma le afa o Ofa e fia o i uta. Ae fai le study na avatu e le isi inisinia pe tatau ona pasi le nonogatupe lena ae alu atu auala atu i le inisinia a le Public Works, fai mai, o le manatu o le inisinia a fai le auala lea, a alu atu le savili, le savili foi lea e matamatagi lea e femitai ai Aleipata, e lelea taavale ona e maualuga tele le mea. O lea la na tupu loa le tsunami na iu loa lea ina faatino o le isi lea auala e faasaoina ai tagata mai i se tsunami e toe oso i le lumanai. Ou te oso soo ai lava iina ou te fia vaai pe i ai se taavale o lelea ae leai lava ma se taavale o lelea, leai foi ma se matagi e agi malosii iina. Ao lea la ou te fia fesili atu aua masalo sa fautuaina foi le Afioga i le Minisita e se tagata poto faapitoa ao lea la ua saunoa, ao taimi uma lava ou te alu atu ai o la e fai faiva, o la e lava e maua ia ma e tele lava foi ia.

O le mea tonu lena o lea ou te fia fesili atu ai po o le a tonu lava le mea lea e fefefe ai ia pe a vaai i le vaa ao lea foi e maua ia i Apia e le o fefefe lava e matamata i vaa ia. O lau lava vaai pe a ou alu i le po o le fia matamata ia o ia pe a o atu vaa ae ou te le malamalama pe mafua i se a?

FOFOGA FETALAI: Malie le Taitai o le Itu Agai sei tuu atu le avanoa i le tali mai a le Afioga i le Minisita mo Punaoa Faalenatura ma Siosiomaga.

Tulai mai lau Afioga i le Minisita.

Tofa Hon Faamoetauloga Ulaitino Faale Tumaalii: Faafetai i lau Afioga i le Fofoga Fetalai mo le avanoa. E fia fesoasoani atu foi i le mataupu i le Lipoti lea ua i lumamea. O le Lipoti lena o le tausaga 2010 ma e sa fai le suesuega e le SROS i le tulaga o tafega o le uafu lea i le au ma le mea alu i ai le suauu po o le a lava se tulaga o vailaau e ono afaina ai le siosiomaga. Sa fai le suesuega ma suesue figota ma autafa o le uafu ma fuafua i le nofoaga lea ua taua e le sui usufono mamalu i le National Reserve lea e i Safata ma faatusatusa po o le a se tulaga o figota ma le tele o figota o lo o i ai i vaega ia e lua. Na maua mai ai e leai se eseese, o lona uiga e tau mai ai e leai se afaina o le siosiomaga i figota o le sami ma ia i autafa o le vaitafe e fuafua i nofoaga e le o i ai. Ma le faaaloalo lava.

FOFOGA FETALAI: Malo faafetai mo le fesoasoani a lau Afioga i le Minisita mo Punaoa Faalenatura ma Siosiomaga.

Tulai mai le Taitai o le Itu Agai e faaii mai le saunoaga.

Afioga Hon PALUSALUE FAAPO II: Faafetai lava i le fesoasoani mai a le Afioga i le Palemia faapea foi le Minisita o lo o tulai mai nei.

6 AUKUSO 2013

P.P. 2012/2013 Nu 30, Lipoti a le Komiti o Galuega, Felauaiga ma Siosiomaga i le P.P. 2011/2012 Nu 36, Lipoti Faaletausaga a le Pulega o Uafu ma Taulaga mo le tausaga faaletupe faaiiuna aso 30 Iuni 2010
- Iloiloga

E le o ni upu a le Taitai o le Itu Agai lea e fai atu ai. O upu o le Lipoti i le afaina o le siosiomaga. E tataua ona fesili sao i o i le Afioga i le Taitaifono ma le Komiti aua o lea ua faafesili mai le Afioga i le Palemia pe fefefe ia? Ou te leiloa aua o lea e aumai i le Lipoti a le Taitaifono faaletonu le siosiomaga ona o le mea toso vaa. Ioe, o le sao lena e le o ni upu a au, o upu a le Taitaifono ma lana Lipoti.

FOFOGA FETALAI: Malie le Taitai o le Itu Afai sei tuu atu le avanoa i le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoli: Lau Afioga i le Fofoga Fetalai ua ou malamalama lelei lava. O le mea e fia faasao lau Afioga. O le mea lea e tupu ai le fenumiai. O lea ua uma ona faamalamalama mai e le Minisita mo Punaoa Faalenatura ma Siosiomaga, lea ua ou matua manino lava e leai e le o se fefe vale o ia ao le suauu.

O tua i Aleipata e le tele ni vaa o i ai a o i Matautu oka, oka le mea o le vaa. Ao afiafi uma lava ou te alu atu ai e toasefulu tamaiti la e matau e le mamao lava ma vaa. Sei mai lea ia, sei mai lea ia, o le mea foi lena ua faasa ai o aua nei toe tago se isi e lau ese le matafaga le la ae ia faasao le matafaga e taele ai le mamalu o le atunuu ma o ai ma latou ofe e seuseu ai ma maua ai latou ia. O lona uiga la o lea ua ou malamalama aua o nei mea o vaa e omai i suauu. Ou te lei vaai lava i ni vaa e omai i suavai, e suauu Aleipata, suauu iinei a o la e maua ia iinei maua foi ia i Aleipata ae ua ala ona ou vave tu atu nei tei ua o atu sui usufono mo Aleipata Itupa i Luga ma Aleipata Itupa i Lalo alu ane ni solo tetee i luga o ni faamatalaga sese a le Taitai o le Itu Agai. Ou te alofa aua e le afaina le sui usufono mo Aleipata Itupa i Luga ao Aleipata Itupa i Lalo lea ou te popole i ai ona ua tau leai se mea foi lea e i luga ona ua tau faaletonu le tula ina nei tei ua avea ni solotetee faapena e afaina ai le soifua o le siosiomaga o le sui usufono ao lea la ua maua lea ua malamalamaga lelei e leai e i ai lava mea o au au fetafeai e aveesea ai mea ia e afaina ai le siosiomaga.

FOFOGA FETALAI: Ia, se i tulai mai le sui usufono mo Faleata Sisifo.

Tofa Lealailepule Rimoni Aiafi: Lau Afioga i le Fofoga Fetalai, na o se fesoasoani i le mataupu leaga o le matou Komiti lea. O lea ua toe tali e le Afioga i le Palemia lana fesili. O iinei i le taulaga, ua masani i le tele o vaa, a o ia i tua i Aleipata e seasea vaai i se vaa. O le taimi lava e vaai ai ua alu atu se mea lapoa faapea, sau loa ofo.

6 AUKUSO 2013

P.P. 2012/2013 Nu 30, Lipoti a le Komiti o Galuega, Felauaiga ma Siosiomaga i le P.P. 2011/2012 Nu 36, Lipoti Faaletausaga a le Pulega o Uafu ma Taulaga mo le tausaga faaletupe faaiiina aso 30 Iuni 2010
- Iloiloga

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, e leai, e le – na muamua lava vaavaai i’a i tua i Aleipata i vaa karasini ia e o i Tutuila ae mulimuli mai iinei. Sa i ai vaa karasini i aso ia, sa muamua lava oo mai i Aleipata aua e sau faatutu agai i Aleipata, ua masani lava la i’a e tilotilo i vaa faapena.

FOFOGA FETALAI: Ia, le Taitai o le Itu Agai, ou te manatu ua malamalama le mataupu. O lea foi ua tali le finagalo o le... Malie lau Afioga i le Taitaifono se i tuu atu le avanoa ona e tali mulimuli mai lea, o lea ua malamalama le mataupu, ae see ese ia ma le tulaga o le siosiomaga, o lea ua malamalama le faamalamalama a le Minisita.

Afioga Hon PALUSALUE FAAPO II: Ona pau lava lau fautuaga lau Afioga i le Fofoga Fetalai, sa tatau ona tuusao mai le fautuaga a le Taitaifono ma le latou Komiti e taofi le mea la e tupu i Aleipata i le mea tosovaa, e taofi. A o le faalavelave, o lea na ona e aumai i le siosiomaga ua afaina, toe gau, ae sa tatau lava ona aumai sao le fautuaga.

Silasila la lau Afioga i le Minisita mo le Siosiomaga i Mulifanua i le palolo la e goto ai, o lea ua saunoa le Palemia, e le utua i ni vai, e utu i le suauu. Ua matua tele foi le afaina o Aiga i le Tai talu ai le suauu lea, ae le gata i lea, o le isi foi vaa tosovaa lea na aumai Saina, na toe faagoto foi ma lena vaa, na o suauu, suauu, suauu lava.

FOFOGA FETALAI: Ia malie ia lau Afioga i le Taitai o le Itu Agai. Se i tulai mai le Minisita mo Galuega, Felauaiga ma Atinae Eeseese.

Afioga Hon Manualesagalala Enokati Posala: Lau Afioga i le Fofoga Fetalai, leaga o lea ua taua le uafu i Mulifanua. Ae ou te manatua lava sa faasalalau mai i le televise le saunoaga a se tasi na fesiligia i mea ia tau taaloga po o le a le aafiaga, ona faapea lea o le tali a le tagata lea, “Se o le siosiomaga.” Le siosiomaga foi lea i totonu o tama taaalo.

E fai sina lautele o le mea lea e talanoa mai ai ona o lea e talanoa mai i Aleipata, ae aafia ai le siosiomaga o Safata. A o le siosiomaga e aofia uma ai e le gata o le sami, o le lauelele, o tagata faigaluega ma mea uma lava na e aafia ai. A o tua i Mulifanua, e leai, e leai se mea na ala ai ona goto le vaa tosovaa ae ona o le afa. E le o se mea e alofia e tatou le afa matautia sa feagai ai na goto ai le vaa lea. O la ua i uta, e leai ma se suauu o i ai. E molia la i le faamasinoga le tagata e faia le molimau ae le o i ai se faamaoniga. E leai se suauu ua uma ona toe tuu i luga o le paumatu la e ua i ai nei, e leai se suauu o i ai. O le faamaninoga atu lea o lea vaega. Ma le faaaloalo lava.

6 AUKUSO 2013

P.P. 2012/2013 Nu 30, Lipoti a le Komiti o Galuega, Felauaiga ma Siosiomaga i le P.P. 2011/2012 Nu 36, Lipoti Faaletausaga a le Pulega o Uafu ma Taulaga mo le tausaga faaletupe faaiiina aso 30 Iuni 2010
- Iloiloga

FOFOGA FETALAI: Malo; o le a tuuina atu le avanoa i le Taitaifono. Aua e te faalogo ia Saleaula aua e leai ma se fesoasoani a Saleaula ia te oe pe a ou faia le faaiuga. O le a tuu atu le avanoa i le Taitaifono atonu a tali atu e manino ai le tulaga lea. O lea ua tali le Minisita, tali le isi Minisita, tali le Palemia, o le a tali atu la le Taitaifono ona faaauau ai lea o lau saunoaga.

Tofa Tusa Misi Tupuola: Lau Afioga i le Fofoga Fetalai ma le mamalu o le Maota, ou te le o toe manatu e tali ona o lea ua tali le Afioga i le Minisita aemaise foi o le Minisita mo Punaoa Faalenatura ma le Siosiomaga.

A silasila lau Afioga i le Fofoga Fetalai, o le Lipoti o le 2010 lea tatou te talanoa i ai, a o mea ia e te saunoa mai ai e faapea e le o taua i le Lipoti a le Komiti, se i silasila ane i le Vaega 6 o Sailiiliga a le Komiti lena e i ai le faapupulaga o vaa ia e te fesili ai, ae le faapea ua faatamala le Komiti. O lena la e i totonu o le Lipoti mea na o meli, ua faaitiitia meli a o lena ua saunoa le Minisita mo Galuega, Felauaiga ma Atinae Esecese a le tatou Malo.

O le tulaga i a tatou tau, o lena foi ua saunoa e le toe i ai se manatu o le Taitaifono, o lena ua malamalama lelei i le tulaga o le faatinoga o le lipoti a le Komiti ae ua talosaga atu mo le pasiaina loa. Ma le faaloalo lava.

FOFOGA FETALAI: Ia, tulai maia lau Afioga i le Taitai o le Itu Agai e faaiu mai le saunoaga.

Afioga Hon PALUSALUE FAAPO II: Lau Afioga i le Fofoga Fetalai, onosai lau Afioga i le Taitaifono e le i uma atu manatu. A o le mea foi lea sa tetee ai le Itu Agai, ona o le le faitauina uma o sailiiliga leaga o la e faafofoga mai Samoa i le tele o la outou galuega sa fai. E tele la outou galuega sa fai, ae lau mai la outou Lipoti, e lau mai na o fautuaga. O le mea la lea e fesili atu ai i lau Afioga i le Taitaifono, pe na oo sa outou sailiiliga i vaa ia na faagoto iinei e pei o le mea tosovaa lea na aumai mai Korea e \$4miliona, a o lea ua outou faagoto nei?

O le isi tulaga, o lea e manaomia e pei o la outou fautuaga mulimuli lea e i ai, o lea e manaomia tupe e faasoasoa lelei e le Pulega. Pe na toe oo sa outou sailiiliga i le lisi la e i tai i le Marina? Ioe, o le aoga tonu lava lena o le Komiti faa-Palemene ina ia suesue ni auala e maua ai tupe maua a le Matagaluega. Aua o lea e maitauina e tele le tupe maua o lo o molimauina i le nofoaga o lo o lisi i le Marina, a o se tamai sene lava na o le \$3,000 la e maua e le SPA.

FOFOGA FETALAI: Malie le sui usufono o lo o saunoa se i tuu atu le avanoa i le Minisita mo Galuega, Felauaiga ma Atinae Esecese.

6 AUKUSO 2013

P.P. 2012/2013 Nu 30, Lipoti a le Komiti o Galuega, Felauaiga ma Siosiomaga i le P.P. 2011/2012 Nu 36, Lipoti Faaletausaga a le Pulega o Uafu ma Taulaga mo le tausaga faaletupe faaiiina aso 30 Iuni 2010
- Iloiloga

Afioga Hon Manualesagalala Enokati Posala: Lau Afioga i le Fofoga Fetalai, o le mea e fia faasao. O lea foi sa alu i nusipepa le \$4miliona lea, e leai, e sese. O lena sa faasao e \$2.5miliona e le \$4miliona le tau o le vaa lea. O le mea tosovaa foi lea sa faaoga sa aumai i luga o le pass sa aumai mai Korea lea na aumai faatasi ma vaega ia. Ae fia faasaoina le vaega lea e le \$4miliona, e \$2.5miliona lena sa faamaonia mai tai i le Pulega o Uafu ma Taulaga. Ua tele naua lea sese pe a fua i ai i faamaumauga ma tupe ia e talanoa ai. Ma le faaaloalo lava.

FOFOGA FETALAI: Ia, se i malie le sui usufono mamalu se i tuu atu le avanoa muamua i le Afioga i le Palemia ona sosoo lea ma le Sui Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai, e i ai le mea lea ou te faanoanoa tele ai, o le mea lea e umi ai a tatou Fono. O le mea o le leai o ni mataupu e aumai i luma ona toe foi lea i tua o le tatou Fonotaga. Na matua uma lelei lava ona faatalanoa le mataupu lea i le lisi ma faamalamalama ae aumai pea, aumai pea le mataupu lenei.

O le faatinoina o le lisi e pei ona talanoaina talu ai ma aumai foi faamatalaga ma faamalamalama, o le lisi lea sa faatino, sa fua lelei lava i le tau o le taimi na fai ai le lisi. E faapena foi la i le taimi lenei. A fua foi le lisi i le taimi lenei, e fua le tau i le taimi lenei. E faapena ona faagasolo mea o a tatou galuega. A o le aumai o se mea faapea e faatupu ai le loto leaga o tagata i atinae o lo o fai nei, ae le silasila mamao i le taimi sa faatinoina ai. O lea sa ou faamatalaina atu le tau o mea, o le 1950, sa ou sau ai faatau atu le tau'i'a a le matou aiga.

O au sa nofo i Saleufi, o le tau o tau'i'a i le taimi lena e 40sene. O le tau o tautalo sa eseese i le 30sene, 20sene ma le 40sene. O le a la le mea lea ua i ai i le taimi lenei? Na ou alu atu i le Aso Sa talu ai, ua alu laui'a sa masani ona \$30, ua \$50 le mea la e ua alu ai. E eseese lava le taimi ma le mea e tupu ai. O nei, ua le toe maua se tautalo po o se tau'ia i le 20sene po o le 40sene - e eseese taimi. A o le faaseseina o le faafofoga mai a le atunuu o lo o maua i le lisi na fai mamao lava i tua ona aumai lea tau atu le taimi nei, lau Afioga o se matua faaleaga tagata le mea lea e fai nei? O lona uiga a laga uma mai lava lisi ia e fai nei a le tatou Malo, o le mea lava lea e tupu ae. Sa tataua ona faapea, e le faapena ni aga faale-Tulafono. O le taimi e saina ai le lisi, e saina lava i le tau o le elele i le taimi lea, ae leai ni lisi faavalevalea e faia a sui lava le tausaga ua sui foi ma le lisi e fai ai.

Lau Afioga i le Fofoga Fetalai, o le mea lena o lea ou te tulai atu ai, ua tupu soo lava le mea lea o le aumai i totonu o mea faapea e faaleaga ai se atinae o lea e aeae ai le atunuu lenei.

6 AUKUSO 2013

P.P. 2012/2013 Nu 30, Lipoti a le Komiti o Galuega, Felauaiga ma Siosiomaga i le P.P. 2011/2012 Nu 36, Lipoti Faaletausaga a le Pulega o Uafu ma Taulaga mo le tausaga faaletupe faaiiina aso 30 Iuni 2010
- Iloiloga

Lau Afioga o le mea lena o lea na ou tulai atu ai ina ia faasao le mea lea ua fai soo, fai soo ma aumai i totonu ona manatu ai lea o tagata ai e i ai ni mea piopio sa fai, po o lo o fai pea e le Malo.

FOFOGA FETALAI: Malo faafetai i le saunoaga a lau Afioga i le Palemia. Se i tuu atu pea le avanoa i le Afioga i le Sui Palemia.

Tofa Hon Fonotoe Nuafesili Pierre Lauofo: Lau Afioga i le Fofoga Fetalai, na o se vaega puupuu lava ona o lea ua saunoa manino le Afioga i le Palemia i le tulaga o le lisi ma le Marina. E sao lelei le saunoaga a le Palemia, e pei e tau atagia ai se uiga tau faaleaga. Na ona ou faamanatu atu i lau Afioga i le Taitai o le Itu Agai, o le Lipoti lea, o lea ua saunoa le Taitaifono o le Lipoti o le 2010. E le i ai se Mariner i le taimi lena. O le a le mea e saga toso mai ai i totonu ii? O le faamalamalamaga lena.

Afioga Hon PALUSALUE FAAPO II: Lau Afioga i le Fofoga Fetalai o se mea e fia faasao.

FOFOGA FETALAI: Malie lau Afioga i le Taitai o le Itu Agai se i alaala mai i lalo se i fai atu le upu lea a le Nofoa.

O le a avatu le fautuaga mulimuli lena i le Nofoa i lau Afioga ona e tatau pea ona ou piama ma ou taotaoama i le tatou Fono. O le tele o le tuu atu o avanoa e agai ai saunoaga i le felefele o mataupu ma tulai mai ai nisi o tulaga e le manaomia i le talanoaina o le Lipoti lena. Na e saunoa i le tulaga o le tolaulauina o sailiiliga ma iugafono ma fautuaga. O le faatinoina o le tulaga lea e oo mai i le aso, o le faaiuga a le Fono Aoa na mafua ai ona le toe faitauina atoa le Lipoti a le Komiti ae ua faitau na o iloiloga ma fautuaga e tuuina mai.

O le ala lea e faapea o le toe tautalagia ua uma ona fai le faaiuga a le Nofoa. E toe faamanatu atu, a fai loa a tatou faaiuga, ia tatou te le toe o i luma ma o i tua. Ou te manatu o lea ua malamalama le folasaga a le Afioga i le Minisita o le Pulega o Uafu ma Taulaga. Ua uma ona tautalagia le tulaga tau le siosiomaga, o lea foi ua toe saunoa faamalamalama le Afioga i le Palemia. O lea o le a tatou oo atu e toso le laau felefele ona uma ai lea o le tatou Fono. Ou te manatu foi o lea ua malamalama le finagalo o le Taitaifono, ma o le a tuu atu le avanoa mulimuli lena i le Taitai o le Itu Agai e faaiu mai ai lau saunoaga ona o lo o i ai se tasi o lo o fia tuuina atu i ai le avanoa i lena Itu o le Maota.

Afioga Hon PALUSALUE FAAPO II: Faafetai – ou te faamalulu atu i lau Afioga i le Palemia ma le Sui Palemia, leaga e limataitaiina lava lau lauga i fautuaga a le Komiti i tupe e faasoaso lelei ma aoao mai aua o le 2010, e aafia ai ma le tausaga nei.

6 AUKUSO 2013

P.P. 2012/2013 Nu 30, Lipoti a le Komiti o Galuega, Felauaiga ma Siosiomaga i le P.P. 2011/2012 Nu 36, Lipoti Faaletausaga a le Pulega o Uafu ma Taulaga mo le tausaga faaletupe faaiiina aso 30 Iuni 2010
- Iloiloga

O le mea la lea, e le o se taufaaleaga, a o lea ou te mulimulitai e tusa ai ma fautuaga a le Taitaifono ma le Komiti.

O le mea la lea lau Afioga i le Fofoga Fetalai, o le a faauma ai ii lau lauga, faafetai mo le avanoa.

Ma le faaaloalo lava, ia manuia le Fono.

FOFOGA FETALAI: Ia, lau Afioga i se tasi o sui usufono mo Salega, Afioga Afualo Wood Uti Salele, o le a tuu atu le avanoa mulimuli lea.

Afioga AFUALO WOOD UTI SALELE: Faafetai i lau Afioga i le Fofoga Fetalai. Lau Afioga i le Taitaifono aemaise le Minisita, atonu lava ona o le 2010, a o lea e maitau atu i le Lipoti aemaise o le uafu lea i Asau i Savaii, ua tele foi fautuaga e molimoli atu, a o lea ua logona foi le Maota e tusa ai o Aleipata, o lea ua saunoa manino le Afioga i le Palemia e tusa ai o i'a la e i tua ua fefefe, se i vacane lou gutu ma le afi. O lona uiga o i'a la e i Savaii ua matua tetemu lava aua e leai se vaa o afe i ai. Faamolemole, se i fesoasoani ane ona e le o i ai se fautuaga, aemaise e moni lava o le 2010, ae tatau pea ona i ai se fautuaga i le taimi leni i le vaai i luma mo le uafu la e i o ma le faaaogaina o le tele o punaoa la e i ai. Faafetai lava mo le avanoa.

FOFOGA FETALAI: Lau Afioga i le Taitaifono; e i ai se isi mea faaopoopo a o le a avatu le fesili?

Tofa TUSA MISI TUPUOLA: Lau Afioga i le Fofoga Fetalai, ou te iloa e leai se isi mea, ae na o le fesili a le Afioga i se tasi o sui usufono mo Salega e uiga i le uafu i Asau, o la e lelei le uafu i Asau. E leai se mea o faaletonu o le tatou uafu i Asau, o la e foi e o i ai vaa, vagana ai vaa tetele ua le o mafai ona o ona o le le lelei lava o le ava agai i totonu.

E faauma atu ai i lau faafetai tele e avea ai au ma sui o le Komiti o Galuega, Felauaiga aemaise foi le Siosiomaga e momoli atu ai le faafetai tele lava i le Pule Sili ma le Faalapotopotoga o le Pulega o Uafu ma Taulaga, e ui lava ina tele a outou feau ma galuega aemaise foi aafiaga ona o mala faalenatura o le uafu ma pulega o taulaga, ae sa vaai pea e le Komiti lo outou galulue punouai aua se manuia o si o tatou atunuu e ala i uafu ma taulaga. Ae o le faafetai ma le agaga o le faamanuia i la outou feau, manuia tele le galulue ai aua feau ma galuega a le atunuu.

Faafetai tele i lau Afioga i le Fofoga Fetalai, faafetai foi i le Palemene. Ma le faaaloalo.

Na faamaonia le Lipoti i le P.P.2011/2012 Nu.36.

6 AUKUSO 2013

P.P. 2012/2013 Nu. 31, Lipoti a le Komiti o Oloa Gaosia Tulaga Muamua, Mataupu Tau Pisinisi, Alamanuia ma Leipa i le P.P. 2011/2012 Nu. 97, Lipoti Faaletausaga a le Faletupe o Atinae a Samoa mo le tausaga faaletupe faaiaina aso 30 Iuni 2011 – Iloiloga

FOFOGA FETALAI: E tusa ai ma le Tulafono Tumau 54, e ao i le Malo ona tuuina mai i le Fono Aoa se Pepa e tali atu ai i Fautuaga na tuuina mai i le Malo mai le Lipoti a le Komiti Filifilia ia le silia le 90 aso talu ona faamaonia e le Fono Aoa le Lipoti.

P.P. 2012/2013 NU. 31, LIPOTI A LE KOMITI O OLOA GAOSIA TULAGA MUAMUA, MATAUPU TAU PISINISI, ALAMANUIA MA LEIPA I LE P.P. 2011/2012 NU. 97, LIPOTI FAALETAUSAGA A LE FALETUPE O ATINAE A SAMOA MO LE TAUSAGA FAALETUPE FAAIUNA ASO 30 IUNI 2011 – ILOILOGA

FOFOGA FETALAI: Tulai mai lau Afioga i le Taitaifono o le Komiti o Oloa Gaosia Tulaga Muamua, Mataupu tau Pisinisi, Alamanuia ma Leipa.

Afioga Hon LEAUPEPE TOLEAFOA APULU FAAFISI (Taitaifono o le Komiti o Oloa Gaosia Tulaga Muamua, Mataupu tau Pisinisi, Alamanuia ma Leipa): Lau Afioga i le Fofoga Fetalai ou te faatu le lafo, *Ina ia faautagia e lenei Fono Aoa le Lipoti a le Komiti o lo o tuuina atu ai ana Sailiiliga, Fautuaga ma Iugafono.*

Faaluaaina e le sui usufono mo Siumu ma le sui usufono mo Satupaitea.

FOFOGA FETALAI: Tulai mai lau Afioga i le Taitaifono.

Afioga Hon LEAUPEPE TOLEAFOA APULU FAAFISI: I le maea ai o le Sailiiliga a le Komiti, ua fautuaina ai le Malo e faapea:

“SAILIILIGA:

1. Ia silasila i nisi aiaiga pe a talafeagai ai ona faavaeina ni teugatupe i le Faletupe o le Atinae mo i latou e nono i ai tupe, e faasee i ai nonogatupe faamaonia lapopoa ae faaoga tusi siaki e talaina ai, ina ia mautinoa ai le faaogaina tatau o ia vaegatupe mo atinae fuafuaina, ae le mo nisi faamoemoga pei ona faavae ai o ni a latou teugatupe faavaitaimi i nisi faletupe i totonu o le atunuu;
2. Toe faamanatu se toe iloiloga mo le feutagaiga o fetuunaiga o tului o nonogatupe ina ia faamama avega ai ia i latou o faatino nonogatupe, aemaise ai o nonogatupe mo atinae tau tagata tafafao maimoa mai ma le aufaifaatoaga;

AUKUSO 2013

P.P. 2012/2013 Nu. 31, Lipoti a le Komiti o Oloa Gaosia Tulaga Muamua, Mataupu Tau Pisinisi, Alamanuia ma Leipa i le P.P. 2011/2012 Nu. 97, Lipoti Faaletausaga a le Faletupe o Atinae a Samoa mo le tausaga faaletupe faaiiuna aso 30 Iuni 2011 – Iloiloga

3. Silasila totoa le Faletupe o Atinae i ni auala e malupuipua ma tulituliloaina ai i latou o lo o i ai ni nonogatupe ina ia foia ai le faafitauli o le tuua e i latou o Samoa mo atunuu mamao, e aunoa ma le silafia e le Faletupe ae lei maea ona totogi a latou nonogatupe. O lea tulaga e le gata ina pagatia ai i latou o lo o faamaoniaina ia nonogatupe, ae ua afaina ai foi tupe maua a le Faletupe e fesoasoani i ana galuega faatino;
4. Faavae se faiga faapaaga i le va o le Faletupe o Atinae ma le Pulega o Tagata Tafafao Maimoa e ala i faamatalaga faa-Faufautua talafeagai e lagolago ai le talosaga mo ni nonogatupe o atinae tau tagata tafafao maimoa ina ia avea o se taiala e mautinoa ai ua malupuipua ia nonogatupe mai aafiaga o tupe maua e fesoasoani ai i le totogiina o nonogatupe faamaonia;
5. Fautuaina malosi le Faletupe o Atinae ina ia silasila i ni auala e faatosina mai ai Afaipisinisi mo le faaaogaina o avanoa o lona fale fou faatasi ai ma lona toe fetuunaiga o le tau o lisi o ia avanoa;

IUGAFONO:

I le maea ai o le iloiloga a le Komiti, na faaiugafonoina ai e fautuaina le Fono Aoa ia faamaonia le Pepa a le Palemene 2011/2012 Nu. 97, Lipoti Faaletausaga a le Faletupe o Atinae a Samoa mo le Tausaga Faaletupe faaiiuna aso 30 Iuni 2011”.

Ma le faaloalo lava, faafetai.

FOFOGA FETALAI: Malo; faafetai i le saunoaga faamalamalama a lau Afioga i le Taitaifono. E manatu ona o lea ua tatou tulalata i le taimi malolo i lenei vaega o le aso, e i ai le talitonuga ua tataua ona faia se tatou faiga malologa ona e i ai foi nisi o polokalame ua faapolokalameina e tataua ona tatou auai faatasi uma ai i lenei vaega o le aso.

O lona ua tufatufaina atu se tasi o Manulauti a le Faalapotopotoga o le Koluse Mumu a Samoa. E talitonu e le tau faamatalaina le matafaioi aoga ma le taua aemaise ai foi o le tautua a lenei Faalapotopotoga i totonu o le atunuu i tausaga e tele – ma o le faalauiloa i lenei aso, o le faalauiloa e patino tonu lava i le tatou Palemene - Promoting Respect for International Humanitarian Law. O lona uiga e taua mo le Palemene le tulaga lea. O lea e tatalo atu ai o lona ua tufaina atu tusi valaaulia i le paia ma le mamalu o le mafutaga nei, ina ia faataua le auaunaga a le Koluse Mumu i totonu o le atunuu.

6 AUKUSO 2013

P.P. 2012/2013 Nu. 31, Lipoti a le Komiti o Oloa Gaosia Tulaga Muamua, Mataupu Tau Pisinisi, Alamanuia ma Leipa i le P.P. 2011/2012 Nu. 97, Lipoti Faaletausaga a le Faletupe o Atinae a Samoa mo le tausaga faaletupe faaiiina aso 30 Iuni 2011 – Iloiloga

O lo o ua tatalo mai le Afioga i le Peresetene Sili o le Red Cross ma le aufaigaluega atoa, na o sina taimi puupuu se i fai le latou folasaga ma saunoa foi le Taitai o le Malo, e atagia ai lo tatou lagolagosua aua o tatou o Taitai o le atunuu tatou te talifuaitau ai i le latou galuega taua o lo o fai i totonu o le atunuu e le tau fesiligia pe faamatalaina.

O lea e tatalo atu ai i lo tatou valaaulia atoa lo tatou Maota, o lo o saunia foi le taumafataga faapitoa o le aoauli, ia tatou talisua ma fai ai fuafuaga a lenei Faalapotopotoga taua mo le Koluse Mumu, ona tolopo ai lea o le tatou Fono mo le aso fono a taeao.

E momoli atu le faafetai tele i le Maota i lenei vaega o le aso, faamalo le onosai. E talitonu le faamoemoe e tele le tulaga ua tatou laasia i nisi o Tulafono faatoa tuuina mai, aemaise foi o Tulafono ua pasia ina ia faagasolo pea galuega a Faauluuluga o Matagaluega ma Matagaluega a le Malo. E momoli atu ai le faafetai tele i lenei aso e ala i le tatou Fono ma le tatou feutagaiina ma fuafuaga o lenei aso ma lauga ua tuuina mai ma tuu atu e lo tatou Maota, faafetai le tofa saili ma le tofa momoli a lo tatou Maota.

E momoli atu foi le faafetai tele i le tapuaiga a lo tatou atunuu i le Aufai-Tatalo ma Samoa atoa mai lava i ona Ao seia oo i ona Iu, ia faafetai le tapuai mai i lenei aso.

A o le i tolopoina le Fono, ou te tatalo atu i le Afioga i le Tamaitai Minisita Lagolago le tamaitai tasi o Salafai, se tasi o sui usufono mo Faasaleleaga Nu. 1, Afioga Hon Gatoloaifaana Amataga Alesana Gidlow e tulai mai e fai se tatou tatalo ona faaiiina ai lea o le tatou Fonotaga o lenei aso.

Tatalo.

Na tolopo Taulumaga a le Fono Aoao i le itula e 1:00 i le aoauli seia aulia le itula e 9:00 i le taeao o le Aso Lulu, 7 Aokuso 2013.